



柳田文庫
文庫11
D 303
12



文庫11
D 303
12

柳田泉文亭

48-10974

010190566094

明史卷五十二 禮六 吉禮六

總裁官總理事務 經筵講官保兼太子太保保和殿大學士兼禮部尚書事加級張廷華奉

敕修

禮六 吉禮六

奉先殿 樂十 凡為天奉慈殿 益以禮音 大京

獻皇帝廟 王親王從饗

功臣配饗 王國宗廟

羣臣家廟

奉先殿 洪武三年太祖以太廟時享未足以展孝思復建奉先殿於宮門內之東以太廟象外朝以奉先殿象



內朝正殿五間南向深二丈五尺前軒五間深半之製
四代帝后神位衣冠定儀物祝文每日朝晡帝及皇太
子諸王二次朝享皇后率嬪妃日進膳羞諸節致祭月
朔薦新其品物視元年所定惟三月不用鯊魚四月減
鱒魚益以王瓜菹五月益以茄九月減柿蟹十月減木
瓜蘆菹益以山藥十一月減天鵝鵝鶉益以獐皆太常
奏聞送光祿寺供薦凡遇時新品物太常供獻又錄皇
考妣忌日歲時享祀以爲常成祖遷都北京建如制宣
德元年奉太宗祔廟二年復遣鄭王瞻埈詣奉先殿設酒
果祭告奉安神位天順七年奉孝恭皇后祔廟畢帝還

行奉安神位禮畧如祔廟儀弘治十七年吏部尚書馬
文升言南京進鮮船本爲奉先殿設輓夫至千人沿途
悉索今揚徐荒旱願倣古凶年殺禮之意減省以甦民
困命所司議行之武宗卽位祧熙祖奉先殿神位亦遷
德祖之西其衣冠牀幔儀物貯於神庫嘉靖十四年定
內殿之祭并禮儀清明中元聖誕冬至正旦有祝文樂
如宴樂兩宮壽旦皇后并妃嬪生日皆有祭無祝文樂
立春元宵四月八日端陽中秋重陽十二月八日皆有
祭用時食舊無祝文今增告詞舊儀但一室一拜至中
室跪祝畢又四拜焚祝帛今就位四拜獻帛爵祝畢后

妃助亞獻執事終獻徹饌又四拜忌祭舊具服作樂今更淺色衣去樂凡祭方澤朝日夕月出告回參及冊封告祭朔望行禮皆在焉十五年禮部尚書夏言等奏悼靈皇后神主先因祔於所親暫祔奉慈殿孝惠太后之側茲三后神主既擬遷於陵殿則悼靈亦宜暫遷奉先殿旁室享祀祭告則一體設饌從之隆慶元年禮部言舊制太廟一歲五享而節序忌辰等祭則行於奉先殿今孝潔皇后既祔太廟則奉先殿亦宜奉安神位乃設神座儀物於第九室遣官祭告如儀萬曆三年帝欲以孝烈孝恪二后神位奉安於奉先殿禮官謂世宗時議

祔陵祭不議祔內殿帝曰奉先殿見有孝肅孝穆孝惠三后神位俱皇祖所定宜遵行祔安蓋當時三后既各祔陵廟仍并祭於奉先殿而外廷莫知也命輔臣張居正等入視居正等言奉先殿奉安列聖祖妣凡推尊爲后者俱得祔寧內殿比之太廟一帝一后者不同今亦宜奉安祔享從之先是冊封告祭以太常寺官執事仍題請遣官至萬曆元年帝親行禮而遣官之請廢二年太常寺以內殿在禁地用內官供事便帝俞其請凡聖節中元冬至歲暮嘉靖初俱告祭於奉先殿十五年罷中元祭四十五年罷歲暮祭隆慶元年罷聖節冬至祭

其方澤朝日夕月出告回叅嘉靖中行於景神殿隆慶元年仍行於奉先殿諸帝后忌辰嘉靖以前行於奉先殿十八年改高皇帝后忌辰於景神殿文皇帝后以下於永孝殿二十四年仍行於奉先殿凡內殿祭告白萬曆二年後親祭則祭品告文執事皆出內監遣官代祭則皆出太常惟品用脯醢者卽親祭亦皆出太常萬曆十四年禮臣言近年皇貴妃冊封祭告奉先殿祝文執事出內庭而祭品取之太常事體不一夫太常專主祀享而光祿則主膳蓋內庭祭告蓋取象於食時上食之義也宜遵舊制凡祭告內殿無論親行遣官其祭品光

祿寺供惟告文執事人親行則辦之內庭遣官則暫用太常寺從之司不齊食而祿寺以奉之儀奉慈殿孝宗卽位追上母妃孝穆太后紀氏謚祔葬茂陵以不得祔廟遂於奉先殿右別建奉慈殿以祀一歲五享薦新忌祭俱如太廟奉先殿儀弘治十七年孝肅周太后崩先是成化時預定周太后祔葬祔祭之議至是召輔臣議祔廟禮劉健等言議誠有之顧當年所引唐宋故事非漢以前制也帝以事當師古乃援孝穆太后別祭奉慈殿爲言而命廷臣議健退復疏論其事以堅帝心於是英國公張懋吏部尚書馬文升等言宗廟

之禮乃天下公議非子孫得以私之毀周七廟父昭子穆各有配座一帝一后禮之正儀春秋書考仲子之宮胡安國傳云孟子入惠公之廟仲子無祭享之所以此見魯秉周禮先王之制猶存祖廟無二配故也伏覲憲宗敕諭有曰朕心終不自安竊窺先帝至情以重違慈意因勉從並配之議羣臣欲權以濟事亦不得已而爲此也據禮區處上副先帝在天遺志端有待於今日稽之周禮有祀先妣之文疏云姜嫄也詩所謂閟宮是已唐宋推尊太后不配食祖廟者則別立殿以享之亦得闕宮之義我朝祀宗迄今已溢九廟配皆無二今宜於

奉先殿外建一新廟如詩之闕宮宋之別殿歲時薦享仍稱太皇太后則情義兩盡議上復召健等至素幄袖出奉先圖指西一區曰此奉慈殿也又指東一區曰此神厨也欲於此地別建廟奉遷孝穆神主併祭於此健等皆對曰最當已而欽天監奏年方有礙延議暫奉於奉慈殿正中徙孝穆居左及孝宗崩武宗卽位禮部始進奉安孝肅神主儀前期致齋三日告奉先殿及孝宗几筵是日早帝具黑翼善冠淺淡色服黑犀帶告孝穆神座禮畢帝詣神座前請神主降座帝捧主立內執事移神座於殿左間帝奉安訖行叩頭禮至午帝詣清寧

宮孝肅几筵行禮畢內侍進神主輿於殿前衣冠輿於丹陛上帝詣拜位親王吉服後隨四拜興帝捧神主由殿中門出奉安輿內執事捧衣冠置輿後隨帝率親王步從至寶善門外太皇太后皇太后率宮妃迎於門內先詣奉慈殿序立於殿西神主輿至奉先殿門外少駐帝詣輿前跪請神主詣奉先殿俯伏興捧神主由殿左門入至殿內褥位跪置神主帝行五拜三叩頭禮畢捧神主仍由左門出安輿內至奉慈殿門外帝捧神主由中門入奉安於神座訖行安神禮三獻如常儀太皇太后以下四拜禮畢內侍官設褥位於殿正中之南帝詣

孝穆皇太后神座前跪請神主謁孝肅太皇太后跪置於褥位上俯伏興行五拜三叩頭禮畢帝捧主輿仍安於神座訖行安神禮如前皇太后以下四拜嘉靖元年世宗奉孝惠邵太后禱祀八年二月禮部尚書方獻夫等言悼靈皇后禮宜祔享太廟但今九廟之制已備考唐宋故事后於太廟未有本室則別廟故曲臺禮有別廟皇后禘祫於太廟之文又禮記喪服小記婦祔於祖姑祖姑有三人則祔於親者釋之者曰親者謂舅所生母也今孝惠太皇太后實皇考獻皇帝之生母則悼靈皇后當祔於側詔可三月行祔廟禮先期祭告諸殿

至期請悼靈后主詣奉慈殿奉安內侍捧神主諡冊衣冠隨帝至奉先殿謁見帝就位行五拜三叩頭禮次詣崇先殿次詣奉慈殿謁三太后內侍捧主安神座皇妃以下四拜十五年帝以三太后別祀奉慈殿不若奉於陵殿爲宜廷臣議古天子宗廟惟一帝一后所生母薦於寢身歿而已孝宗奉慈殿之祭蓋子祀生母以盡終身之孝焉耳然禮妾母不世祭疏曰不世祭者謂子祭之於孫則止明繼祖重故不復顧其私祖母也今陛下於孝肅曾孫也孝穆孫屬也孝惠孫也禮不世祭議當祧考宋熙寧罷奉慈廟故事與今同宜遷主陵廟歲時

祔享如故報可奉慈殿遂罷世宗孝烈后隆慶時祀弘孝殿萬曆三年遷祔奉先殿穆宗母孝恪皇太后隆慶初祀禱霄殿又祔孝懿后於其側六年孝懿祔太廟萬曆三年孝恪遷祔奉先殿兩殿俱罷獻皇帝廟嘉靖二年四月始命興獻帝家廟享祀樂用八佾初禮官議廟制未決監生何淵上書請立世室於太廟東禮部尚書汪俊等皆謂不可帝諭奉先殿側別立一室以盡孝思禮官集議以言奉慈之建禮臣據姜嫄特廟而言至爲本生父立廟大內古所未有惟漢哀爲定陶共王建廟京師不可爲法詹事石瑋等亦言不可

不聽葺奉慈殿後爲觀德殿以奉之四年四月淵已授
光祿寺署丞復上書請立世室崇祀皇考於太廟禮部
尚書席書等議天子七廟周文武並有功德故立文武
世室於三昭穆之上獻皇帝追稱帝號未爲天子淵妄
爲諛詞乞寢其奏帝令再議書等言將置主於武宗上
則武宗君也分不可僭置武宗下則獻皇叔也神終未
安特廷臣於稱考稱伯異同相半至議祔廟無一人以
爲可者學士張璠桂萼亦皆以爲不可書復密疏爭之
帝不聽復令會議乃準漢宣故事於皇城內立一禰廟
如文華殿制籩豆樂舞一用天子禮帝親定其名曰世

廟五年七月諭工部以觀德殿窄隘欲別建於奉天殿
左尚書趙璜謂不可不聽乃建於奉先之東曰崇先殿
十三年命易承天家廟曰隆慶殿十五年以避渠道遷
世廟更號曰獻皇帝廟遂改舊世廟曰景神殿寢殿曰
永孝殿十七年以豐坊請稱宗以配明堂禮官不敢違
集議者久之言古者父子異昭穆兄弟同世數故殷有
四君一世而同廟宋太祖太宗同居昭位今皇考與孝
宗當同一廟遂奉獻皇帝祔太廟二十二年更新太廟
廷議睿宗孝宗並居一廟同爲昭帝責諸臣不竭忠任
事寢其議已而左庶子江汝璧請遷皇考廟於穆廟首

以當將來世室與成祖廟並峙右贊善郭希顏又欲於太祖廟文世室外止立四親廟而祧孝宗武宗以禮臣斥其妄而止二十四年六月新太廟成遂奉睿宗於太廟之左第四序躋武宗上而罷特廟之祀四十四年以舊廟柱產芝更號曰玉芝宮定日供時享儀穆宗初因禮臣請乃罷時享及節序忌辰有事奉告之祭但進日供而已隆慶元年禮科王治請罷獻皇祔廟而專祀之世廟章下所司萬曆九年禮科丁汝謙請仍專祭玉芝宮復奉宣宗帝后冠服於太廟帝責汝謙妄議謫外任天啟元年太常少卿李宗延奏祧廟宜議六月睿宗入廟

世宗無窮之孝思也然以皇上視之則遠矣俟光宗升祔時或從舊祧或從新議蓋在孝子固以恩事親而在仁人當以義率祖章下禮部卒不能從親王從享洪武三年定以皇伯考壽春王王夫人劉氏爲一壇皇兄南昌王霍邱王下蔡王安豐王霍邱王夫人翟氏安豐王夫人趙氏爲一壇皇兄蒙城王盱眙王臨淮王臨淮王夫人劉氏爲一壇後定夫人皆改稱妃皇姪寶應王六安王來安王都梁王英山王山陽王昭信王爲一壇凡二十九位春夏於仁祖廟東廡秋冬及歲除於德祖廟東廡皇帝行初獻禮時獻官詣神位分

獻四年進親王於殿內東壁九年新太廟成增祀蒙城
王妃田氏盱眙王妃唐氏王德中御史徐文華言族有
成人而無後者祭終兄弟之孫之身諸王至今五六世
矣宜祧禮官議不可嘉靖間仍序列東廡二十四年新
建太廟成復進列東壁罷分獻萬曆十四年太常卿裴
應章言諸王本從祖祧食今四祖之廟已祧而諸王無
所於祧宜罷享而祧之祧廟禮部言祧以藏毀廟之主
爲祖非爲孫禮有祧不聞有配祧者請仍遵初制序列
東廡爲近禮報可
功臣配享洪武二年享太廟以廖永安俞通海張得勝

桑世傑耿再成胡大海趙德勝配設青布幃六於太廟
殿中遣官分獻俟皇帝亞獻將畢行禮每歲春秋享廟
則配食於仁祖廟之東廡三年定配享功臣常遇春以
下凡八位春夏於仁祖廟西廡秋冬於德祖廟西廡設
位東向遂罷幃次之設更定三獻禮皇帝初獻時獻官
卽分詣行禮不拜四年太祖謂中書省臣太廟之祭以
功臣配列廡間今既定太廟合祭禮朕以祖宗具在使
功臣故舊歿者得少依神靈以同享祀不獨朝廷宗廟
盛典亦以寓朕不忘功臣之心於是禮官議凡合祭時
爲黃布幃殿中祖考神位旁設兩壁以享親王及功臣

明史卷五十二 志 十一
令大臣分獻制可已而命去布幄九年新太廟成以徐
達常遇春李文忠鄧愈湯和沐英俞通海張德勝胡大
海趙得勝耿再成桑世傑十二位配於西廡罷廖永安
建文時禮部侍郎宋禮言功臣自有雞籠山廟請罷太
廟配享帝以先帝所定不從且令候太廟享畢別遣官
卽其廟祭之洪熙元年以張玉朱能姚廣孝配享太廟
遣張輔朱勇王通及尚寶少卿姚繼各祭其父嘉靖九
年以廖道南言罷姚廣孝十年以刑部郎中李瑜議進
劉基位次六王十六年以武定侯郭勛奏進其祖英初
二廟功臣位各以爵及進基位公侯上至是復令禮官

議合二廟功臣敘爵於且之列英於桑世傑上張玉朱能
於沐英下基於世傑下二十四年進諸配位於新太廟
西壁罷分獻萬曆十四年太常卿裴應章言廟中列后
在上異姓之臣禮當別嫌且至尊拜俯於下諸臣之靈
亦必不安命復改西廡遣官分獻天啟元年太常少卿
李宗延言前代文臣皆有從祀我朝不宜獨闕下禮部
議不行

王國宗廟洪武四年禮部尚書陶凱等議定王國宮垣
內左宗廟右社稷廟制殿五間寢殿如之門三間永樂
八年建秦愍王享堂命視晉恭王制加高一丈因定享

堂七間廣十丈九尺五寸高二丈九尺深四丈三尺五寸弘治十三年寧王宸濠奏廟祀禮樂未有定式乞頒賜遵守禮部議洪武元年學士宋濂等奏定諸王國祭祀禮樂用清字但有曲名而無曲辭請各王府稽考於是靖江王長史具上樂章且言四孟上旬及除夕五祭所用品物俎豆佾舞禮節悉遵國初定制從之嘉靖八年秦王充燿言代懿王當祔廟而自始封至今已盈五廟之數請定祔廟之制禮臣言親王祔廟古制未聞宜推太廟祔祔之禮而降殺之始封居中百世不遷以下四世親盡而祔但諸侯無祔廟祔主宜祔始祖之家置積藏之每歲暮則出祔主合祭詔如議

羣臣家廟明初未有定制權倣朱子祠堂之制奉高曾祖禰四世神主以四仲之月祭之加臘月忌日之祭與歲時俗節之薦其庶人得奉祖父母父母之祀已著爲令至時享於寢之禮畧同品官祠堂之制堂三間兩階三級中外爲兩門堂設四龕龕置一桌高祖居西以次而東藏主積中兩壁立櫃西藏遺書衣物東藏祭器旁親無後者以其班附庶人無祠堂以二代神主置居室中間無積洪武六年定公侯以下家廟禮儀凡公侯品官別爲祔屋三間於所居之東以祀高曾祖考并祠位

祠堂未備奉主於中堂享祭二品以上羊一豕一五品以上羊一以下豕一皆分四體熟薦不能具牲者設饌以享所用器皿隨官品第稱家有無前二日主祭者聞於上免朝參凡祭擇四仲吉日或春秋分冬夏至前期一日齋沐更衣宿外舍質明主祭者及婦率預祭者詣祠堂主祭者捧正祔神主櫝置於盤令子弟捧至祭所主祭開櫝捧各祖考神主主婦開櫝捧各祖妣神主以序奉安子弟捧祔主置東西壁執事者進饌讀祝者一人就贊禮以子弟親族爲之陳設神位訖各就位主祭在東伯叔諸兄立於其前稍東諸親立於其後主婦在

西母及諸母立於其前稍西婦女立於後贊拜皆再拜主祭者詣香案前跪三上香獻酒奠酒執事酌酒於祔位前讀祝者跪讀訖贊拜主祭者復位與主婦皆再拜再獻終獻並如之惟不讀祝每獻執事者亦獻於祔位禮畢再拜焚祝并紙錢於中庭安神主於櫝成化十一年祭酒周洪謨言臣庶祠堂神主俱自西而東古無神道尚右之說惟我太祖廟制合先王左昭右穆之義宜令一品至九品皆立一廟以高卑廣狹爲殺神主則高祖居左曾祖居右祖居次左考居次右帝下禮臣參酌更定嘉靖十五年禮部尚書夏言言按三代有五廟三

廟二廟一廟之制者以其有諸侯卿大夫上中下之爵也後世官職既殊無世封采邑豈宜過泥於古至宋儒程頤乃始約之而歸於四世自公卿以及士庶莫不皆然謂五服之制皆至高祖則祭亦當如之今定官自三品以上立五廟以下皆四廟為五廟者亦如唐制五間九架厦旁隔板為五室中祔五世祖旁四室祔高曾祖禰為四廟者三間五架中一室祔高曾左右二室祔祖禰若當祀始祖則如朱熹所云臨祭時作紙牌祭訖焚之其三品以上者至世數窮盡則以今之得立廟者為世世奉祀之祖而不遷焉四品以下四世遞遷而已從

之

志第二十九

教修

禮七 嘉禮一

登極儀

大明儀

常朝儀

皇太子親王朝儀

諸王來朝儀

諸司朝覲儀

中宮受朝儀

朝賀東宮儀

大宴儀

上尊號敬號儀

明史卷五十二終

廷者曰朝會曰宴饗曰上尊號敬號

明史卷五十二

志

四

明史卷五十二

也後世官職既殊無世襲之制
 禮殿乃始約之而歸於世世自公卿大夫士
 祭謂五服之制昔至高祖廟祭亦當如之今定官制
 而以上立五廟以下皆以廟為至廟者亦如唐制五廟
 九架屋旁隔板為五室中禮五世祖廟室則為行廟
 廟為四廟者三間五架則一室禱高曾左右二室禱
 顯考祖妣廟則如宋制殿云臨祭時作依廟祭先
 之其三四品以上者至世數窮盡則以今之得二廟
 之世奉禱之祖而不遷焉四品以下四世世禱一廟

明史卷五十二

志第二十九

總裁總聖務 經筵講官保兼李太極殿學士兼禮部尚書加級張廷壽奉
 敕修

禮七 嘉禮

登極儀

大朝儀

常朝儀

皇太子親王朝儀

諸王來朝儀

諸司朝覲儀

中宮受朝儀

朝賀東宮儀

大宴儀

上尊號徽號儀

二日嘉禮行於朝廷者曰朝會曰宴饗曰上尊號徽號

日冊命日經筵日表箋行於辟雍者日視學自天子達於庶人者日冠日婚行於天下者日巡狩日詔赦日鄉飲酒舉其大者書之儀之同者則各附於其類云

登極儀漢高帝卽位汜水之陽其時縣蕞之禮未備魏晉以降多以受禪改號元世祖履尊既久一統後但舉朝賀明興太祖以吳元年十二月將卽位命左相國李善長等具儀善長率禮官奏卽位日先告祀天地禮成卽帝位於南郊丞相率百官以下及都民耆老拜賀舞蹈呼萬歲者三具鹵簿導從詣太廟上追尊四世冊寶告祀社稷還具袞冕御奉大殿百官上表賀先期待儀

司設表案於丹墀內道之西北設丞相以下拜位於內道東西每等異位重行北面捧表展表宣表官位於表案西東向糾儀御史二人於表案南東西向宿衛鎮撫二人於東西陛下護衛白戶二十四人於其南稍後知班二人於文武官拜位北東西向通贊贊禮二人於知班北通贊西贊禮東引文武班四人於文武官拜位北稍後東西向引殿前班二人於引文武班南舉表案二人於引文武班北舉殿上表案二人西陛下東向丹陛上設殿前班指揮司官三人東向宣徽院官二人西向儀鸞司官於殿中門之左右護衛千戶八人於殿東西

明史卷五十三 志 二
門俱東西向鳴鞭四人於殿前班之南北向將軍六人於殿門左右天武將軍四人於陛上四隅俱東西向殿上尚寶司設寶案於正中侍儀司設表案於寶案南文武侍從兩班於殿上東西文起居注給事中殿中侍御史尚寶卿武懸刀指揮東西向受表官於文侍從班南西向內贊二人於受表官之南捲簾將軍二人於簾前俱東西向是日拱衛司陳鹵簿列甲士於午門外列旗仗設五輅於奉天門外侍儀舍人二舉表案入鼓初嚴百官朝服立午門外通贊贊禮宿衛官諸侍衛及尚寶卿侍從官入鼓三嚴丞相以下入皇帝袞冕陞御座大

樂鼓吹振作樂止將軍捲簾尚寶卿置寶於案拱衛司鳴鞭引班導百官入丹墀拜位初行樂作至位樂止知班贊班贊禮贊拜樂作四拜興樂止捧表以下官由殿西門入內贊贊進表捧表官跪捧受表官搢笏跪受置於案出笏興退立東向內贊贊宣表宣表官前搢笏跪展表官搢笏同跪宣訖展表官出笏以表復於案俱退宣表官俯伏興俱出殿西門復位贊禮贊拜樂作四拜樂止搢笏三舞蹈拱手加額呼萬歲者三出笏俯伏興樂作四拜賀畢遂遣官冊拜皇后冊立皇太子以卽位詔告天下成祖卽位倉猝其議不詳仁宗卽位先期司

設監陳御座於奉天門欽天監設定時鼓尚寶司設寶
案教坊司設中和韶樂設而不作是日早遣官告天地
宗社皇帝具孝服告几筵至時鳴鐘鼓設鹵簿皇帝袞
冕御奉天門百官朝服入午門鴻臚寺導執事官行禮
請陞御座皇帝由中門出陞座鳴鞭百官上表行禮願
詔俱如儀宣宗以後儲宮嗣立者並同正德十六年世
宗入承大統先期造行殿於宣武門外南向設帷幄御
座備翼善冠服及鹵簿大駕以候至期百官郊迎駕入
行殿行四拜禮明日由太明門入省詔草改年號素服
詣大行几筵謁告畢設香案奉天殿丹陛上皇帝袞冕

行告天地禮詣奉先殿奉慈殿謁告仍詣大行几筵慈
壽皇太后莊肅皇后前各行禮遂御華蓋殿百官朝服
入傳旨免賀五拜三稽首鴻臚寺官請陞殿帝由午門
出御奉天殿鳴鞭贊拜願詔如制大朝儀漢正會禮夜漏未盡七刻鐘鳴受賀公卿以下
大朝儀漢正會禮夜漏未盡七刻鐘鳴受賀公卿以下
執贊來庭二千石以上升殿稱萬歲然後宴饗晉減寧
注有晝會之分唐制正旦冬至五月朔千秋節咸受朝
賀宋因之明太祖洪武元年九月定正旦朝會儀與登
極畧相仿其後屢詔更定立爲中制凡正旦冬至先日
尚寶司設御座於奉天殿及寶案於御座東香案於丹

陞南教坊司設中和韶樂於殿內東西北向翌明錦衣
衛陳鹵簿儀仗於丹陛及丹墀設明扇於殿內列車輅
於丹墀鳴鞭四人左右北向教坊司陳大樂於丹陛東
西北向儀禮司設同文玉帛兩案於丹陛東金吾衛設
護衛官於殿內及丹陛陳甲士於丹墀至午門外錦衣
衛設將軍於丹陛至奉天門外陳旗幟於奉天門外俱
東西列典牧所陳仗馬犀象於文武樓南東西向司晨
郎報時位於內道東近北紆儀御史二位於丹墀北內
贊二位於殿內外贊二位於丹墀北傳制宣表等官位
於殿內俱東西向鼓初嚴百官朝服班午門外次嚴由

左右掖門入詣丹墀東西北向立三嚴執事官詣華蓋
殿帝具袞冕陞座鐘聲止儀禮司奏執事官行禮贊五
拜畢奏請陞殿駕輿中和樂作尚寶司捧寶前行導駕
官前導扇開簾捲寶置於案樂止鳴鞭報時對贊唱排
班班齊贊禮唱鞠躬大樂作贊四拜興樂止典儀唱進
表樂作給事中二人詣同文案前導引序班舉案由東
門入置殿中樂止內贊唱宣表目宣表日官跪宣訖俯
伏興唱宣表展表官取表宣表官至簾前外贊唱眾官
皆跪宣表訖內外皆唱俯伏興序班舉表案於殿東外
贊唱眾官皆跪代致詞官跪丹陛中致詞云具官臣某

茲遇正旦三陽開泰萬物咸新冬至則云律應黃鐘日當長至恭惟皇帝陛下膺乾納祐奉天永昌賀畢外贊唱衆官皆俯伏興樂作四拜興樂止傳制官跪奏傳制由東門出至丹陛東向立稱有制贊禮唱跪宣制正旦則云履端之慶與卿等同之冬至則云履長之慶與卿等同之萬壽聖節則致詞曰具官臣某欽遇皇帝陛下聖誕之辰謹率文武官僚敬祝萬歲壽不傳制贊禮唱俯伏興樂止贊播笏鞠躬三舞蹈贊跪唱山呼百官拱手加額曰萬歲唱山呼曰萬歲唱再山呼曰萬萬歲凡呼萬歲樂工軍校齊聲應之贊出笏俯伏興樂作贊四拜興樂止儀禮司奏禮畢中和樂作鳴鞭駕興尚寶官捧寶導駕官前導至華蓋殿樂止百官以次出洪武三十年更定同文玉帛案俱進安殿中宣表訖舉置於寶案之南嘉靖十六年更定蕃國貢方物案入於丹陛中道左右設定時鼓於文樓上大樂陳奉天門內東西北向他儀亦畧有增損立春日進春都城府縣舉春案由東階陞跪置於丹陛中道俯伏興贊拜樂作四拜興樂止文武官北向立致詞官詣中道之東跪奏云新春吉辰禮當慶賀贊拜樂作五拜三叩頭興樂止儀禮司奏禮畢正統十一年正旦立春禮部議順天府官進春後

百官卽詣班行賀正旦禮舊制冬至日行賀禮嘉靖九年分祀二郊以冬至大報是日行慶成禮次日帝請內殿行節祭禮又詣母后前行賀禮訖始御奉天殿受賀常朝儀古禮天子有外朝內朝燕朝漢宣帝五日一朝唐制天子日御紫宸殿見羣臣日常參朔望御宣政殿見羣臣日入闈宋則侍從官日朝垂拱謂之常參百司五日一朝紫宸爲六參在京朝官朔望朝紫宸爲朔參望參明洪武三年定制朔望日帝皮弁服御奉天殿百官朝服於丹墀東西再拜班首詣前同百官鞠躬稱聖躬萬福復位皆再拜分班對立省府臺部官有奏由西階陞殿奏畢降階百官出十七年罷朔望起居禮後更定朔望御奉天殿常朝官序立丹墀東西向謝恩見辭官序立奉天門外北向陞座作樂常朝官一拜三叩頭樂止復班謝恩見辭官於奉天門外五拜三叩頭畢駕輿又凡早朝御華蓋殿文武官於鹿頂外東西立鳴鞭以次行禮訖四品以上官入侍殿內五品以下仍前北向立有事奏者出班奏畢鳴鞭以次出如御奉天殿先於華蓋殿行禮奏事畢五品以下詣丹墀北向立五品以上及翰林院給事中御史於中左中右門候鳴鞭詣殿內序立朝退出凡百官於御前侍坐有官奏事必起

立奏畢復坐從皇帝行丹墀常北面不南向左右周旋
不肯北皇帝陞奉天門及丹陛隨從官不得徑由中道
并王道二十四年定侍班官東則六部都察院堂上官
十三道掌印御史通政司大理寺太常寺太僕寺應天
府翰林院春坊光祿寺欽天監尚寶司太醫院五軍斷
事及京縣官西則五軍都督錦衣衛指揮各衛掌印指
揮給事中中書舍人又令禮部置百官朝牌大書品級
列丹墀左右木柵上依序立二十六年令凡入殿必履
鞮永樂初令內閣官侍朝立金臺東錦衣衛在西後移
御道東西對立四年諭六部及近侍官曰早朝多四方

所奏事午後事簡君臣之間得從容陳論自今有事當
商確者皆於晚朝七年諭行在禮部曰北京冬氣嚴凝
羣臣早朝奏事立久不勝今後朝畢於右順門內便殿
奏事景泰初定午朝儀凡午朝御左順門設寶案執事
奏事官候於左掖門外駕出以次入內閣五府六部奏
事官六科侍班官案西序立侍班御史二序班二將軍
四案南面北立鳴贊一案東西向立錦衣衛鴻臚寺東
向立管將軍官侍衛官立於將軍西府部奏事畢撤案
各官退有密事赴御前奏嘉靖九年令常朝官禮畢內
閣官由東陞錦衣衛官由西陞陞立於寶座東西有欽

明史卷五十三 志
差官及外國人領敕坊局官一人奉敕立內閣後稍上
候領敕官辭奉敕官承旨出左陛下循御道授之隆慶
六年詔以三六九日視朝萬曆三年令常朝日記注起
居官四人列於東班給事中上稍前以便觀聽午朝則
列於御座西稍南凡入朝次第洪武二十四年令朝參
將軍先入近侍次之公侯駙馬伯又次之五府六部又
次之應天府及在京雜職官員又次之成化十四年令
進士照辦事衙門次第立見任官後

皇太子親王朝儀前史多不載明洪武元年九月定制
凡正旦等大朝皇帝御奉天殿先設皇太子親王次於
文樓設拜位并拜褥於丹陛上正中皇帝陞座殿前執
事班起居訖引進引皇太子及親王由奉天東門入百
官齊入樂作皇太子親王陞自東階至丹陛拜位樂止
贊四拜樂作興樂止引進導由殿東門入樂作內贊引
至御座前位樂止唱跪皇太子跪稱賀云長子某茲遇
履端之節冬至則云履長謹率諸弟某等欽詣父皇陛
下稱賀傳制如前贊俯伏興皇太子諸王由東門出樂
作引進引復丹陛位樂止贊四拜樂作興樂止降自東
階樂作至文樓樂止百官隨入賀其朝皇后則於坤寧
宮畧如朝皇帝儀二十六年改定朝賀於乾清宮其日

皇帝皇后陞座侍從導引如儀引禮引皇太子及妃親王及妃詣上位前贊禮贊四拜興贊禮引皇太子詣前贊跪引禮贊太子妃諸王及妃皆跪皇太子致詞同前不傳制贊禮贊皇太子俯伏興引禮贊諸王俯伏興太子妃諸王妃皆興贊禮引皇太子復位贊拜皇太子以下皆四拜禮畢引禮引至皇后前其前後贊拜皆如朝皇帝儀致詞稱母后殿下禮畢出七年更定不致賀辭止行八拜禮朝賀皇太后禮皆同

諸王來朝儀古者六年五服一朝漢法有四見儀魏制藩王不得入覲晉泰始中令王公以下入朝者四方各

爲二番唐以後親藩多不就國明代仿古封建親王之藩不常入朝朝則賜賚甚厚明初凡來朝先期陳御座於奉天殿如常儀諸王次於奉天門外東耳房鼓三嚴百官入就侍立位引禮導王具袞冕由東門入陞東陛就位王府從官就丹墀位贊拜樂作王與從官皆四拜興樂止王從殿東門入樂作內贊導至御前樂止王跪王府官皆跪王致辭曰第幾子某王某茲遇某時入覲欽詣父皇陛下朝拜贊俯伏興王由東門出樂作復拜位樂止贊拜王與從官皆四拜興樂作駕興王及各官以次出洪武二十六年定凡諸王大朝行八拜禮常朝

一拜凡伯叔兄見天子在朝行君臣禮便殿行家人禮
伯叔兄西向坐受天子四拜天子居中南面坐以尚親
親之義存君臣之禮凡外戚朝見皇后父母見帝行君
臣禮后見父母行家人禮皇太子見皇后父母皇后父
母西向立皇太子東向行四拜禮皇后父母立受兩拜
答兩拜

諸司朝覲儀明制天下官三年一入朝自十二月十六
日始鴻臚寺以次引見二十五日後每日方面官隨常
朝官入奉天門行禮府州縣官及諸司首領官吏土官
吏俱午門外行禮正旦大朝以後方面官於奉天殿前
序立知府以下奉天門金水橋南序立如常朝儀天順
三年令凡方面官入朝遞降京官一等萬曆五年令凡
朝覲南京府尹行太僕寺苑馬寺卿布按二司俱於十
二月十六日朝見外班行禮由右掖門至御前鴻臚寺
官以次引見其鹽運司及知府以下官吏浙江江西十
七日山東山西十八日河南陝西十九日湖廣南直隸
二十日福建四川二十一日廣東廣西二十二日雲南
貴州二十三日北直隸二十四日各外班行禮至御前
引見免朝則止仍候御朝日引見正旦朝賀俱入殿前
行禮凡朝覲官見辭謝恩具公服正旦具朝服不著朱

履常朝俱錦繡

中宮受朝儀惟唐開元禮有朝皇太后及皇后受羣臣賀皇后會外命婦諸儀明制無皇后受羣臣賀儀而皇妃以下正旦冬至朝賀儀則自洪武元年九月詔定凡中宮朝賀內使監設皇后寶座於坤寧宮丹陛儀仗內使執之殿上儀仗女使執之陳女樂於宮門外設皇貴妃幄次於宮門外之西近北設公主幄次於宮門外之東稍南設外命婦幄次於門外之南東西向皇后服褱衣出閣仗動樂作陞座樂止司賓導外命婦由東門入內道東西班侍立訖導皇貴妃衆妃由東門入至陞上

拜位贊拜樂作四拜興樂止導由殿東門入樂作內贊接引至殿上拜位樂止贊跪妃皆跪皇貴妃致詞曰妾某氏等遇茲履端之節冬至則云履長恭詣皇后殿下稱賀致詞畢皆俯伏興樂作復位樂止贊拜樂作四拜興樂止降自東階出司賓導公主由東門入至陞上拜位以次立行禮如皇妃儀司賓導外命婦入殿前中道拜位贊拜如儀班首由西陞陞入殿西門樂作內贊接引至殿上拜位班首及諸命婦皆跪班首致詞曰某國夫人妾某氏等稱賀賀畢出復位司言跪承旨由殿中門出立露臺之東南向稱有旨命婦皆跪司言宣旨曰

履端之慶與夫人等共之贊興司言奏宣旨畢皇后興樂作入內閣門樂止諸命婦出太皇太后皇太后朝賀儀同洪武二十六年重定中宮朝賀儀先日女官設御座香案至日內官設儀仗陳女樂於丹陛東西北向設箋案於殿東門命婦至宮門司賓引入就拜位女官具服侍班尚宮尚儀等官詣內奉迎皇后具服出作樂贊拜如前儀女官舉箋案由殿東門入樂作至殿中樂止贊跪命婦皆跪贊宣箋曰女官宣訖贊展箋宣箋女官詣案前展宣訖舉案於殿東命婦皆興司賓引班首由東階陞入殿東門樂作內贊引至殿中樂止贊跪班首

及諸命婦皆跪班首致詞訖皆興由西門出贊拜及司言宣旨皆如儀禮畢千秋節致詞云茲遇千秋令節敬詣皇后殿下稱賀不傳旨凡朔望命婦朝參是日設御座於宮中陳儀仗女樂皇后陞座引禮女官引命婦入班文東武西各以夫品贊拜樂作四拜禮畢出陰雨大寒暑則免後命婦朝賀俱於仁智殿朝東宮妃儀如朝中宮不傳令

朝賀東宮儀漢以前無聞隋文帝時冬至百官朝太子張樂受賀唐制宮臣參賀皇太子皆舞蹈開元始罷其禮故事百官詣皇太子止稱名惟宮臣稱臣明洪武十

四年給事中鄭相同請如古制詔下羣臣議編修吳沈等議曰東宮國之大本所以承天體而承天位也臣子尊敬之禮不得有二請凡啓事東宮者稱臣如故從之凡朝東宮前期典璽官設皇太子座於文華殿錦衣衛設儀仗於殿外教坊司陳大樂於文華門內東西北向府軍衛列甲士旗幟於門外錦衣衛設將軍十二人於殿中門外及文華門外東西向儀禮司官設箋案於殿東門外設百官拜位於殿下東西設傳令宣箋等官位於殿內東西是日百官詣文華門外導引官啓外備皇太子具冕服出樂作陞座樂止百官入贊拜樂作四拜

興樂止丞相陞自西階至殿內拜位俱跪丞相致詞曰某等茲遇三陽開泰萬物維新敬惟皇太子殿下茂膺景福畢俯伏興復位舍人舉箋案入殿中其捧箋展箋宣箋傳令畧與皇后同令曰履茲三陽願同嘉慶餘俱如儀冬至致詞則易律應黃鐘日當長至傳令則易履長之節千秋節致詞則云茲遇皇太子殿下壽誕之辰謹率文武羣官敬祝千歲壽不傳令凡朔望百官朝退詣文華殿門外東西立皇太子陞殿樂作百官行一拜禮其謝恩見辭官亦行禮洪武元年十二月帝以東宮師傅皆勲舊大臣當待以殊禮命議三師朝賀東宮儀

禮官議曰唐制羣臣朝賀東宮行四拜禮皇太子答後
二拜三公朝賀前後俱答拜近代答拜之禮不行而三
師之禮不可不重今擬凡大朝賀設皇太子座於大本
堂設答拜褥位於堂中設三師賓客諭德拜位於堂前
皇太子常服陞座三師賓客常服入就位北向立皇太
子起立南向贊四拜皇太子答後二拜六年詔百官朝
見太子朝服去蔽膝及佩二十九年詔廷臣議親王見
東宮儀禮官議諸王來見設皇太子位於正殿中設諸
王拜位於殿門外及殿內設王府官拜位於庭中道上
之東西設百官侍立位於庭中東西向至日列甲士陳
儀仗設樂如常諸王詣東宮門外幄次皇太子常服出
樂作陞座樂止引禮導諸王入就殿門外位初行樂作
就位樂止導詣殿東門入樂作內贊引至位北向立樂
止贊跪王與王府官皆跪致詞曰茲遇某節恭詣皇太
子殿下致詞畢王與王府官皆俯伏興樂作復位樂止
贊拜樂作王與王府官皆四拜興樂止禮畢王及各官
以次出王至後殿叙家人禮東宮及王皆常服王由文
華殿東門入至後殿王西向東宮南向相見禮畢叙坐
東宮正中南面諸王列於東西嘉靖二十八年禮部奏
故事皇太子受朝賀設座文華殿中今易黃瓦似應避

尊帝日東宮受賀位當設文華門之左南向然侍衛未備已之隆慶二年冊皇太子詔於文華殿門東間設座受賀

大宴儀漢大朝會羣臣上殿稱萬歲舉觴百官受賜宴饗大作樂唐大饗登歌或於殿庭設九部伎宋以春秋仲月及千秋節大宴羣臣設山樓排場窮極奢麗明制有大宴中宴常宴小宴洪武元年大宴羣臣於奉天殿二品以上陞殿餘列於丹墀遂定正旦冬至聖節宴謹身殿禮二十六年重定大宴禮陳於奉天殿永樂元年以郊祀禮成大宴十九年以北京郊社宗廟及宮殿成

大宴宣德正統間朝官不與者給賜節錢凡立春元宵四月八日端午重陽臘八日永樂間俱於奉天門賜百官宴用樂其後皆宴於午門外不用樂立春日賜春餅元宵日團子四月八日不落莢嘉靖中改不落莢為麥餅端午日涼糕糉重陽日糕臘八日麵俱設午門外以官品序坐宣德五年冬久未雪十二月大雪帝示羣臣喜雪詩復賜賞雪宴羣臣進和章帝擇其寓警戒者錄之而為之序皇太后聖誕正統四年賜宴午門東宮千秋節永樂間賜府部堂上春坊科道近侍錦衣衛及天下進箋官宴於文華殿宣德以後俱宴午門外凡祀園丘方澤祈穀

朝日夕月耕藉經筵日講東宮講讀皆賜飯親蠶賜內
外命婦飯纂修校勘書籍開館暨書成皆賜宴閣臣九
年考滿賜宴於禮部九卿侍宴新進士賜宴曰恩榮凡
大饗尚寶司設御座於奉天殿錦衣衛設黃麾於殿外
之東西金吾等衛設護衛官二十四人於殿東西教坊
司設九奏樂歌於殿內設大樂於殿外立三舞雜隊於
殿下光祿寺設酒亭於御座下西膳亭於御座下東
膳亭於御座東西設御筵於御座東西設皇
太子座於御座東西向諸王以次南東西相向羣臣四
品以上位於殿內五品以下位於東西廡司壺尚酒尚

食各供事至期儀禮司請陞座駕輿大樂作陞座樂止
鳴鞭皇太子親王上殿文武官四品以上由東西門入
立殿中五品以下立丹墀贊拜如儀光祿寺進御筵大
樂作至御前樂止內官進花光祿寺開爵注酒詣御前
進第一爵教坊司奏炎精之曲樂作內外官皆跪教坊
司跪奏進酒飲畢樂止衆官俯伏興贊拜如儀各就位
坐序班詣羣臣散花第二爵奏皇風之曲樂作光祿寺
酌酒御前序班酌羣臣酒皇帝舉酒羣臣亦舉酒樂止
進湯鼓吹響節前導至殿外鼓吹止殿上樂作羣臣起
立光祿寺官進湯羣臣復坐序班供羣臣湯皇帝舉筋

羣臣亦舉筋贊饌成樂止武舞入奏平定天下之舞第三爵奏眷皇明之曲樂作進酒如初樂止奏撫安四夷之舞第四爵奏天道傳之曲進酒進湯如初奏車書會同之舞第五爵奏振皇綱之曲進酒如初奏百戲承應舞第六爵奏金陵之曲進酒進湯如初奏八蠻獻寶舞第七爵奏長楊之曲進酒如初奏採蓮隊子舞第八爵奏芳醴之曲進酒進湯如初奏魚躍於淵舞第九爵奏駕六龍之曲進酒如初光祿寺收御爵序班收羣臣盞進湯進大膳大樂作羣臣起立進訖復坐序班供羣臣飯食訖贊膳成樂止撤膳奏百花隊舞贊撤案光祿寺撤御案序班撤羣臣案贊宴成羣臣皆出席北向立贊拜如儀羣臣分東西立儀禮司奏禮畢駕興樂止以次出其中宴禮如前但進七爵常宴如中宴但一拜三叩頭進酒或三或五而止凡宴命婦坤寧宮設儀仗女樂皇后常服陞座皇妃皇太子妃王妃公主亦常服隨出閣入就位大小命婦各立於座位後丞相夫人率諸命婦舉御食案丞相夫人捧壽花二品外命婦各舉食案於皇妃皇太子妃王妃公主前大小命婦各就座位奉御執事人分進壽花於殿內及東西廡酒七行上食五次酌酒進湯樂作止竝如儀

上尊號徽號儀子無爵父之道漢高帝感家令之言而尊太公荀悅非之晉哀帝欲尊崇皇太妃江彪以爲宜告顯宗之廟明事不在已宋元志俱載皇太后上尊號儀而不行告廟非禮也明制天子登極奉母后或母妃爲皇太后則上尊號其後或以慶典推崇皇太后則加二字或四字爲徽號世宗時上兩宮皇太后增至八字上徽號致詞而上尊號則止進寶冊上尊號自宣宗登極尊皇太后始先期遣官祭告天地宗社帝親告太宗皇帝大行皇帝几筵是日鳴鐘鼓百官朝服奉天門設冊寶綵輿香亭中和韶樂及大樂設而不作內官設皇

太后寶座陳尊於宮中設冊寶案於寶座前設皇帝拜位於丹陛正中親王拜位於丹墀內女樂設而不作皇帝冕服御奉天門奉冊寶官以冊寶置輿中內侍舉輿皇帝隨輿降階陞輅百官於金水橋南北向立輿至皆跪過輿隨至思善門外橋南北向立皇帝至思善門內降輅皇太后陞座輿至丹陛皇帝由左門入至陛右北向立親王冕服各就位奏四拜皇帝及王以下皆四拜奉冊寶官以冊寶由殿中門入立於左皇帝由殿左門入至拜位跪親王百官皆跪奏摺圭奏進冊奉冊官以冊跪進皇帝受冊獻訖執事官跪受置案左奏進寶

奉寶宮以寶跪進皇帝受寶獻訖執事官跪受置案右
奏出圭奏宣冊執事官跪宣讀皇帝俯伏興由左門出
至拜位奏四拜傳唱百官同四拜禮畢駕興是日皇帝
奉皇太后謁奉先殿及几筵行謁謝禮禮畢皇太后還
宮服燕居冠服陞座皇帝率皇后皇妃親王公主及六
尚等女官行慶賀禮翌日外命婦四品以上行進表箋
禮宣德以後儀同正統初尊太皇太后儀同天順八年
二月增命婦致詞云某夫人妾某氏等恭惟皇太后陞
下尊居慈極永膺福壽弘治十八年上兩宮尊號改皇
太后致詞云尊居慈闈茂隆福壽嘉靖元年二月上尊

號以四宮行禮過勞分爲二日又以武宗服制未滿莊
肅皇后免朝賀命婦賀三宮亦分日上徽號自天順二
年正月奉皇太后始致詞云嗣皇帝臣伏惟皇太后陞
下功德兼隆顯崇徽號永膺福壽率土同歡命婦進表
慶賀致詞云某夫人妾某氏等恭惟皇太后陛下德同
坤厚允協徽稱壽福無疆輿情歡戴餘如常儀後上徽
號及加上徽號仿此成化二十三年禮部具儀上未及
皇太子妃禮持命增之

庶人冠禮

皇后儀古者立后無冊命禮至漢靈帝立宋美人爲
皇后始御殿命太尉持節奉冊受讀冊皇后北面稱臣

皇太子及親王命婦之
親及吐土嶽親也北風外二十三手甄陪具謝土未及
批單穴耐齋酥壽無與計燭熨繪吸常繪發土嶽
慶賢姪隨云某夫人妾某丹著恭册皇太子册下慈同
不也慈兼劉顯崇燧照承甄誦壽率土同燭命敬並表
辛丑月奉皇太子故姪隨云臨皇帝召外册皇太子册
顯皇司京博賢命敬賢三宮亦今日土嶽親自天則二
親以四宮亦甄燧榮公為二日又以左宗親陳未嶽菲

明史卷五十四 禮志第三十

人益總裁官總理事務 經筵講官保謙李太保保和殿大學兼管吏部尚書事加級張廷壽奉

敕修 受册命之非非向典册二人於世册土南實册二

奉册禮八 嘉禮二 其東非其西向始受册禮

册皇后儀 册妃嬪 册皇太子及皇太子妃儀

其立册親王及王妃儀 册公主 西向始受册

奉天册皇帝加元服儀 皇太子皇子冠禮

品官冠禮 庶人冠禮

册皇后儀古者立后無册命禮至漢靈帝立宋美人為
皇后始御殿命太尉持節奉璽綬讀册皇后北面稱臣

明史卷五十四
一
妾跪受其後沿爲定制而儀文代各不同明儀注大抵
參唐宋之制而用之太祖初定制凡冊皇后前期三日
齋戒遣官祭告天地宗廟前一日侍儀司設冊寶案於
奉天殿御座前設奉節官位於冊案之東掌節者位於
其左稍退設承制官位於其南俱西向設正副使受制
位於橫街之南北向設承制宣制官位於其北設奉節
奉冊奉寶官位於其東北俱西向設正副使受冊寶褥
位於受制位之北北向典儀二人位丹陛上南贊禮二
人位正副使北知班二人位贊禮之南俱東西相向百
官及侍從位如朝儀是日早列鹵簿陳甲士設樂如儀

內官設皇后受冊位及冊節寶案於宮中設香案於殿
上設權置冊寶案於香案前設女樂於丹陛質明正副
使及百官入鼓三嚴皇帝袞冕御奉天殿禮部官奉冊
寶各置於案諸執事官各入就殿上位立樂作四拜興
樂止承制官奏發皇后冊寶承制訖由中門出降自中
陛至宣制位曰有制正副使跪承制官宣制曰冊妃某
氏爲皇后命卿等持節展禮宣畢由殿西門入正副使
俯伏興執事者舉寶冊案由中門出降自中陛奉節官
率掌節者前導至正副使褥位以案置於北掌節者脫
節衣以節授奉節官奉節官以授正使正使以授掌節

者掌節者跪受興立於正使之左奉節官退引禮引正使詣受冊位奉冊官以冊授正使正使跪受置於案退復位副使受寶亦如之樂作正副使四拜興樂止正使隨冊副使隨寶掌節者前導舉案者次之樂作出奉天門樂止侍儀奏禮畢駕興百官出掌節者加節衣奉冊寶官皆搢笏取冊寶置龍亭內儀伏大樂前導至中宮門外樂作皇后具九龍四鳳冠服褱衣出閣至殿上南向立樂止正副使奉冊寶權置於門外所設案上引禮引正副使及內使監令俱就位正使詣內使監令前稱冊禮使臣某副使臣某奉制受皇后冊寶內使監令入

告皇后出復位引禮引內外命婦入就位正使奉冊授內使監令內使監令跪受以授內官副使授寶亦如之各復位內使監令率奉冊奉寶內官入各置於案尚儀引皇后降陞詣庭中位立內官奉冊寶立於皇后之東西內使監令稱有制尚儀奏拜皇后拜樂作四拜興樂止宣制訖奉冊內官以冊授讀冊內官讀訖以授內使監令內使監令跪以授皇后皇后跪受以授司言奉寶如前儀受訖以授司寶尚儀奏拜皇后拜如前內使監令出詣正副使前稱皇后受冊禮畢使者退詣奉天殿橫街南北面西上立給事中立於正副使東北西向正

副使再拜復命曰奉制冊命皇后禮畢又再拜給事中
奏聞乃退皇后既受冊寶升座引禮引內命婦班首一
人詣殿中賀位跪致詞曰茲遇皇后殿下膺受冊寶正
位中宮妾等不勝懽慶謹奉賀贊拜樂作再拜興樂止
退復位又引外命婦班首一人入就殿上賀位如內命
婦儀禮畢俱出皇后降座樂作還閣樂止次日百官上
表箋稱賀皇帝御殿受賀如常儀遂卜日行謁廟禮先
遣官用牲牛行事告以皇后將祇見之意前期皇后齋
三日內外命婦及執事內官齋一日設皇后拜位於廟
門外及廟中設內命婦陪祀位於廟庭南外命婦陪祀
位於內命婦之南司贊位皇后拜位之東西司賓位內
命婦之北司香位香案右陳盥洗於階東司盥洗官位
其所至日內外命婦各翟衣集中宮內門外皇后具九
龍四鳳冠服禕衣出內宮門升輿至外門外降輿升重
翟車鼓吹設而不作尚儀陳儀衛次外命婦次內命婦
皆乘車前導內使監扈從宿衛陳兵仗前後導從皇后
至廟門司賓引命婦先入皇后降車司贊導自左門入
就位北向立命婦各就位北向立司贊奏拜司賓贊拜
皇后及命婦皆再拜興司贊請詣盥洗位盥手悅手由
東陛升至神位前司贊奏上香者三司香捧香於右皇

后三上訖導復位贊拜如前司贊奏禮畢皇后出自廟之左門命婦以次出皇后升車命婦前導如來儀過廟鼓吹振作皇后入宮是日皇帝宴羣臣於謹身殿皇后宴內外命婦於中宮皆如正旦宴會儀及成祖卽位冊皇后徐氏其制小異皇帝皮弁服御華蓋殿翰林院官以詔書用寶訖然後御奉天殿傳制皇后受冊禮畢翰林官以詔書授禮部官禮部官奉詔書於承天門開讀皇帝還宮率皇后具服詣奉先殿謁告畢皇后具服於內殿俟皇帝升座贊引女官導詣拜位行謝恩禮樂作八拜興樂止禮畢次日皇帝皇后受賀宴會如前儀天

順八年增定親王於皇帝前慶賀次詣皇太后慶賀次詣皇后前八拜儀嘉靖十三年冊皇后方氏禮臣具儀注有謁告內殿儀無謁告太廟世廟之禮帝命議增於是禮臣以儀上先期齋三日所司陳設如時祫儀至日皇帝御輅皇后妃御翟車同詣太廟命官奉七廟主升神座訖皇帝奉高皇帝主皇后奉高皇后主出升神座迎神上香奠帛裸獻樂作止皆如儀次詣世廟行禮同上儀隆慶元年增定頒詔次日命婦行見皇后禮冊妃之儀自洪武三年冊孫氏爲貴妃定皇帝不御殿承制官宣制曰妃某氏特封某妃命卿等持節行禮但授冊

無寶餘竝如中宮儀永樂七年定冊妃禮皇帝皮弁服御華蓋殿傳制至宣宗立孫貴妃始授寶憲宗封萬貴妃始稱皇非洪武之舊矣嘉靖十一年帝冊九嬪禮官上儀注先日所司陳設儀仗如朔望儀至期皇帝具袞冕告太廟世廟訖易皮弁服御華蓋殿百官公服入行禮正副使朝服承制舉節冊至九嬪宮九嬪迎於宮門外隨至拜位女官宣冊九嬪受冊先後八拜送節出宮門復命九嬪隨具服候皇后率詣奉先殿謁告及詣皇帝皇后前謝恩俱如冊妃禮惟圭用次玉穀文銀冊少殺於皇妃五分之一二十年冊德妃張氏以妃將就室

而帝方靜攝不傳制不謁告內殿餘竝如舊

冊皇太子及皇太子妃儀自漢代始稱皇太子明帝始有臨軒冊拜之儀唐則年長者臨軒冊授幼者遣使內冊宋惟用臨軒元惟用內冊不以長幼明興定制冊皇太子所司陳設如冊后儀設皇太子拜位於丹陛上中嚴皇帝袞冕御謹身殿皇太子冕服俟於奉天門外辦皇帝升奉天殿引禮導皇太子入奉天東門樂作山東階升至丹陛位樂止百官各就丹墀位樂作皇太子再拜興樂止承制官由殿中門出立於門外已有制皇太子跪宣制曰冊長子某爲皇太子皇太子俯伏興樂作

再拜樂止引禮導皇太子由殿東門入樂作內贊導至御座前樂止內贊贊跪贊宣冊宣畢贊指圭贊授冊皇太子指圭跪受冊以授內侍復贊授寶如授冊儀贊出圭皇太子出圭俯伏興由殿東門出執事官舉節冊寶隨出皇太子復位樂作四拜興樂止由東階降樂作至奉天門樂止儀仗鼓樂迎冊寶至文華殿持節官持節復命禮部官奉詔書赴午門開讀百官迎詔至中書省頒行侍儀奏禮畢駕興還宮皇太子詣內殿候皇后升座行朝謝禮四拜恭謝曰小子某茲受冊命謹詣母后殿下恭謝復四拜禮畢親王世子郡王侯於文華殿陞

上皇太子升座親王以下由東陞升就拜位四拜長王恭賀曰小弟某茲遇長兄皇太子榮膺冊寶不勝欣忭之至謹率諸弟詣殿下稱賀賀畢皆四拜皇太子興以次出諸王詣中宮四拜長王致詞賀畢皆四拜出是日皇太子詣武英殿見諸叔家人禮四拜諸叔西向坐受見諸兄家人禮二拜諸兄西向立受次日百官進表箋慶賀內外命婦慶賀中宮如常儀乃擇日太子謁太廟洪武二十八年皇太子親王俱授金冊不用寶永樂二年定先三日齋戒遣官祭告天地宗廟受冊寶畢先詣太廟謁告後至奉天殿謝恩乃入謝中宮二十一

年十月冊東宮以梓宮在殯樂設而不作奉先殿行禮
畢仍詣几筵謁告宣德二年十一月皇子生羣臣表請
立太子三年二月行禮以太子尚幼乃命正副使授冊
寶於文華門成化十一年以冊立皇太子禮成文武官
分五等賜綵緞有差嘉靖十八年二月冊東宮帝詣南
郊告上帝詣太廟告皇祖自北郊及列聖宗廟以下皆
遣官時太子方二歲保姆奉之迎冊寶於文華殿門詣
皇帝前謝恩皇后貴妃代太子八拜詣皇后前貴妃代
八拜詣貴妃前保姆代四拜餘如常儀其皇太子妃受
冊與皇太子同日傳制節冊將至內殿妃降自東階迎

置於案贊就拜位贊跪妃跪贊宣冊女官跪取冊立宣
畢贊授冊贊搯圭女官以冊授妃妃搯圭受冊訖以授
女官女官跪受捧立贊出圭與四拜禮畢內官持節出
妃送至殿外正副使持節復命是日妃具禮服詣奉先
殿行謁告禮隨詣宮門俟皇帝皇后升座入謝恩行八
拜禮又詣各宮皇妃前行四拜禮還宮詣皇太子前亦
四拜禮畢升座王妃公主郡主及外命婦於丹墀拜賀
如儀

冊親王及王妃儀漢冊親王於廟唐臨軒冊命禮極詳
備宋有冊命之文皆上表辭免惟迎官諾還第元亦降

制命之不行冊禮明洪武三年定制冊命親王先期告宗廟所司陳設如冊東宮儀至日皇帝御奉天殿皇太子親王由奉天東門入樂作升自東陛皇太子由殿東門入內贊導至御前侍立位親王入至丹陛拜位樂止贊拜樂作再拜興樂止承制官承制如儀諸王皆跪宣制曰封皇子某爲某王某爲某王宣畢諸王俯伏興贊拜樂作再拜興樂止引禮導王由殿東外入樂作內贊引至御座前拜位樂止王跪贊授冊捧冊官以冊授讀冊官讀訖以授丞相丞相授王王摺圭受以授內使授寶如上儀訖王出圭俯伏興引禮導王出復位以次引

諸王入殿授冊寶如儀內使以冊寶置綵亭訖贊拜樂作諸王皆四拜興樂止內使奉亭前行親王由東階降樂作出奉天東門樂止禮部尚書請詔書用寶赴午門開讀禮畢皇帝還宮皇太子出王年幼則遣官齎冊寶授之丞相承制至王所東北立西南向宣制最幼者行保抱之禮是日親王朝謝皇后太子與東宮受冊朝謝同親王各自行賀幼者詣長者行四拜禮百官詣親王賀亦行四拜禮丞相至殿上跪文武官於庭中丞相致詞曰某官某等茲遇親王殿下榮膺冊寶封建禮成無任欣忭之至賀畢丞相及百官復四拜次日皇太子冕

服於奉天殿朝賀皇帝太子致詞曰長子某茲遇諸弟
某等受封建國謹詣父皇陛下稱賀賀中宮致詞曰謹
詣母后殿下稱賀百官進表箋賀皇帝及中宮東宮如
東宮受冊儀內外命婦賀中宮致詞曰妾某氏等茲遇
親王受封建國恭詣皇后殿下稱賀是日百官及命婦
各賜宴擇日諸王謁太廟時秦晉燕楚吳五王皆長而
齊潭趙魯四王方幼故兼具其制靖江王則以親王封
故視秦晉儀二十八年定制親王嫡長子年十歲授金
冊寶立爲王世子次嫡及庶子皆封郡王凡王世子必
以嫡長王年三十正妃未有嫡子其子止爲郡王待王

與正妃年五十無嫡子始立庶長子爲王世子襲封朝
廷遣人行冊命之禮成化末封興岐益衡雍五王帝親
告奉先殿遣使就各王府冊之罷臨軒禮而諸王當襲
封者俱於歲終遣官冊封嘉靖中改於孟春著爲令冊
王妃與冊太子妃儀同冊公主儀洪武九年七月命使
冊公主設冊案於乾清宮御座之東南冊用銀字鍍金
皇帝皇后升御座遣使捧冊傳制如儀使者至華蓋殿
公主拜受其儀畧與冊太子妃同凡皇姑曰大長公主
皇姊妹曰長公主皇女曰公主親王女曰郡主郡王女
曰縣主孫女曰郡君曾孫女曰縣君元孫女曰鄉君郡

主以下受誥封不冊命

皇帝加元服儀古者冠必於廟天子四加魏以後始冠於正殿又以天子至尊禮惟一加歷代因之明洪武三年定制先期太史院卜日工部製冕服翰林院撰祝文禮部具儀注中書省承制命某官攝太師某官攝太尉既卜日遣官告天地宗廟前一日內使監令陳御冠席於奉天殿正中其南設冕服案及香案寶案侍儀司設太師太尉起居位於文樓南西向設拜位於丹墀內道設侍立位於殿上御席西設盥洗位於丹陛西其百官及諸執事位次如大朝儀是日質明鼓三嚴百官入皇

帝服空頂幘雙童髻雙玉導絳紗袍御輿以出侍衛警蹕奏樂如儀皇帝升座鳴鞭報時訖通班贊各供事太師太尉先入就拜位百官皆入贊拜樂作四拜興樂止引禮導太師先詣盥洗位搢笏盥訖訖出笏由西陛升內贊接引至御席西東向立引禮復導太尉盥訖訖入立於太師南侍儀奏請加元服太尉詣皇帝前少右跪搢笏脫空頂幘以授內使置於箱進櫛設纒畢出笏興退立於西太師前北向立內使監令取冕立於左太師祝曰令月吉日始加元服壽考維祺以介景福內使監令捧冕跪授太師太師搢笏跪受冕加冠加簪纓訖出

日身卷三十四
二
笏興退立於西御用監令奏請皇帝著袞服皇帝興著
袞服侍儀奏請就御座內贊贊進醴樂作太師詣御前
北面立光祿卿奉酒進授太師太師搢笏受酒祝曰甘
醴惟厚嘉薦令芳承天之休壽考不忘祝訖跪授內使
內使跪受酒捧進皇帝受祭少許啐酒訖以虛盞授內
使樂止內使受盞降授太師太師受盞興以授光祿卿
光祿卿受盞退太師出笏退復位內贊導太師太尉出
殿西門樂作降自西階引禮導至丹墀拜位樂止贊拜
樂作太師太尉及文武官皆四拜興樂止三舞蹈山呼
俯伏興樂作復四拜樂止禮畢皇帝興鳴鞭樂作入宮

樂止百官出皇帝改服通天冠絳紗袍拜謁太后如正
旦儀擇日謁太廟與時祭同明日百官公服稱賀賜宴
謹身殿萬曆三年正月帝擇日長髮命禮部具儀大學
士張居正等言禮重冠婚皇上前在東宮已行冠禮三
加稱尊執爵而酌鉅禮既成可畧其細不必命部臣擬
議第先期至奉先殿弘孝殿神霄殿以長髮告禮畢詣
兩宮皇太后行五拜三叩頭禮隨御乾清宮受賀帝是
之遂著爲令

皇太子皇子冠禮禮曰冠於阼以著代也醮於客位三
加彌尊加有成也已冠而字之成人之道也雖天子之

元子猶士也其禮歷代用之明皇太子加元服參用周
文王成王冠禮之年近則十二遠則十五嘉靖二十四
年穆宗在東宮方十歲欲行冠禮大學士嚴嵩尚書費
宗初皆難之後遂阿旨以爲可行而請稍簡煩儀止取
成禮帝以冠當具禮至二十八年始行之其儀洪武元
年定前期太史監卜日工部置袞冕諸服翰林院撰祝
文中書省承制命某官爲賓某官贊既卜日遣官告天
地宗廟前一日陳御座香案於奉天殿設皇太子次於
殿東房賓贊次於午門外質明執事官設盥洗於東階
設皇太子冠席於殿上東南西向設醴席於西階上南

向張帷幃於東序內設褥席於帷中又張帷於序外御
用監陳服於帷內東領北立袞服九章遠遊冠絳紗袍
折上巾緇纚犀簪在服南櫛又在南司尊實醴於側尊
加勺羃設於醴席之南設站於尊東置三爵進饌者實
饌設於尊北諸執事者各立其所鼓三嚴文武官入皇
帝服通天冠絳紗袍升座如常儀賓贊就位樂作四拜
興樂止侍儀司跪承制降至東階詣賓前稱有敕賓贊
及在位官皆跪宣制曰皇太子冠命卿等行禮皆俯伏
興四拜文武侍從班俱就殿內位賓贊執事官詣東階
下位東宮官及太常博士詣殿前東房導皇太子入就

冠席二內侍夾侍東宮官後從樂作卽席西南向樂止
賓贊以次詣盥洗樂作搯笏盥悅出笏樂止升自西階
執事者奉折上巾進賓降一等受之右執項左執前進
太子席前北面祝畢跪冠樂作賓興席南北面立贊冠
者進席前北面跪正冠興立於賓後內侍跪進服皇太
子興服訖樂止賓揖皇太子復坐賓贊降詣盥洗訖贊
進前跪脫折上巾置於箱興以授內侍執事者奉遠遊
冠進賓降二等受之樂作進冠如前儀贊進前北面跪
簪結紘內侍跪進服樂止賓揖皇太子復坐又詣盥洗
贊脫冠執事者奉袞冕進賓降三等受之樂作進冠結

紘內侍跪進服如前儀樂止太常博士導皇太子降自
東階樂作由西階升卽醴席南向坐樂止賓詣盥洗盥
悅訖贊冠者取爵盥爵悅爵詣司尊所酌醴授賓賓受
爵跪進於皇太子祝畢皇太子搯圭跪受爵樂作飲訖
奠爵執圭進饌者奉饌於前皇太子搯圭食訖執圭興
樂止徹爵與饌博士導皇太子降自西階至殿東房易
朝服詣丹墀拜位北向東宮官屬各復拜位賓贊詣皇
太子位稍東西向賓少進字之辭曰奉敕字某皇太子
再拜跪聽宣敕復再拜興進御前跪奏曰臣不敏敢不
祇承奏畢復位侍立官竝降殿復位四拜禮畢皇帝興

明史卷五十四
內給事導皇太子入內殿見皇后如正旦儀明日謁廟
如時享禮又明日百官朝服詣奉天殿稱賀退易公服
詣東宮稱賀錫宴成化十四年續定皇太子冠禮先日
設幕次於文華殿東序設節案香案冠席醴席盥洗司
尊所等具如儀內侍張帷幄陳袍服皮弁服袞服圭帶
烏翼善冠皮弁九旒冕質明皇帝御奉天殿傳制遣官
持節皇太子迎於文華殿門外捧入置於案退禮部官
導皇太子詣香案前樂作四拜樂止行初加冠禮內侍
奉翼善冠賓祝曰吉月令辰乃加元服懋敬是承永介
景福樂作賓跪進冠興樂止禮部官啟易服皇太子入

幄易袍服出啟復坐行再加冠禮內侍奉皮弁賓祝曰
冠禮申舉以成令德敬慎威儀惟民之式冠畢入幄易
皮弁服易出啟復坐行三加冠禮內侍奉冕旒賓祝曰
章服咸加飭敬有虔永固皇圖於千萬年冠畢入幄易
袞服出啟復坐行醴禮皇太子詣醴席樂作即坐樂止
光祿寺官舉醴案樂作贊酌醴授賓賓執爵詣席前樂
止賓祝曰旨酒孔馨加薦再芳受天之福萬世其昌賓
跪進爵皇太子搢圭受爵置於案教坊司作樂奏喜千
春之曲次啟進酒皇太子舉爵飲訖奠爵於案樂止光
祿寺官進饌樂作至案樂止饌訖出圭徹案賓贊復位

鳴贊贊受敕戒皇太子降階樂作至拜位樂止宣敕戒
官詣皇太子前稍東西向立曰有制皇太子跪宣敕戒
曰孝事君親友于兄弟親賢愛民居仁由義毋怠毋驕
茂隆萬世樂作四拜興樂止持節官捧節出樂作皇太
子送節至殿門外還東序內侍導還宮樂止賓贊等官
持節復命餘如舊儀是日皇太子詣皇太后皇帝皇后
前謝俱行五拜三叩頭禮用樂明日皇帝及皇太子受
群臣賀如儀皇子冠禮初加進網巾祝詞曰茲惟吉日
冠以成人克敦孝友福祿來駢再加進翼善冠祝詞曰
冠禮斯舉實由成德敬慎威儀維民之則三加進衮冕

祝詞曰冠至三加命服用章敬神事土永固藩邦酌禮
祝曰旨酒嘉薦載芬載芳受茲景福百世其昌敕戒詞
曰孝于君親友于兄弟親賢愛民率由禮義毋溢毋驕
永保富貴其陳設執事及傳制謁謝竝如皇太子儀初
皇子冠之明日百官稱賀畢詣王府行禮成化二十三
年皇子冠之次日各詣奉天門東廡序坐百官常服四
拜萬曆二十九年禮部尚書馮琦言舊制皇太子冠設
冠席醴席於文華殿內今文華殿爲皇上臨御遣官之
地則皇太子冠醴席應移於殿之東序又親王冠舊設
席於皇極門之東廡今皇太子移席於殿東序則親王

應移席於殿西序從之永樂九年十一月命皇太子嫡
長子爲皇太孫冠於華蓋殿其儀與皇太子同

品官冠禮古者男子二十而冠大夫五十而後爵故無
大夫冠禮唐制三加一品之子以衮冕逮九品之子以
爵弁皆倣士禮而增益之明洪武元年定制始加緇布
冠再加進賢冠三加爵弁其儀前期擇日主者告於家
廟乃筮賓前二日戒賓及贊冠者明日設次於大門外
之右南向至日夙興設洗於阼階東南東西當東雷六
品以下當東榮南北以堂深罍水在洗東加勺鬯篚在
洗西南肆實巾一於篚加鬯設席於東房西牖下陳服

於席東領北王莞筵四加藻席四在南側尊甒醴在服
北加勺鬯設楫在尊北四品以下設篚無楫饌陳於楫
北設洗於東房近北罍在洗西篚在洗東北肆實以巾
質明賓贊至門外掌次者引之次賓贊公服諸行事者
各服其服就位冠各一笥人執之侍於西階之西東面
北上設主席於阼階上西面設賓席於西階東面冠者
席於主者東北西面主者公服立於阼階下當東序西
面諸親公服立於罍洗東南西面北上尊者在別室儻
者公服立於門內道東北面冠者雙童髻空頂幘雙玉
導綵摺錦紳烏皮履六品以下導不以玉立於房中南

面主者贊冠者公服立於房內戶東西面賓及贊冠者
出次立於門西東面北上僮者進受命出立門東西面
曰敢請事賓曰某子有嘉禮命某執事僮者入告主者
迎賓於大門外之東西面再拜賓答拜主者揖贊冠者
贊冠者報揖又揖賓賓報揖主者入賓贊次入及內門
至階主者請陞賓三辭乃陞主者自阼階立於席東西
向賓自西階立於席西東向賓贊冠者及庭盥於洗陞
自西階入於東房立於主贊冠者之南西面主贊冠者
導冠者立於房外之西南面賓贊冠者取纒櫛簪跪奠
於筵南端退立於席北少東西面賓揖冠者冠者進升

席西向坐賓贊冠者進筵前東面跪脫雙童髻櫛畢設
纒興復位立賓降至盥洗盥訖詣西階主者立於席後
西面賓立於西階上東面執纒布冠者升賓降一等受
之右執項左執前進冠者筵前東向立祝用士禮祝詞
祝畢跪冠興復位賓贊冠者進筵前東面跪結纓興復
位冠者興賓揖之適房賓主皆坐冠者衣青衣素裳出
戶西南面立賓主俱興賓揖冠者冠者進升席西向坐
賓贊冠者跪脫纒布冠櫛畢設纒賓進進賢冠立祝如
初加禮易萬年爲永年
易胡福爲遐福祝畢跪冠興復位賓贊冠者跪
脫進賢冠櫛畢設纒賓進爵弁立祝如再加禮賓贊冠

者設簪結纓如前冠者適房著爵弁之服出主贊冠者
徹纓櫛及筵入於房又設筵於室戶西南向冠者出房
戶西南面立主贊洗觶於房酌醴出南面立賓揖冠者
就筵西南面立賓受醴進冠者筵前北面立祝畢冠者
拜受觶賓復西階上答拜執饌者進饌於筵冠者左執
觶右取脯祭於籩豆間贊者取脯一以授冠者奠觶於
薦西以祭冠者坐取觶祭醴奠觶再拜賓答拜冠者執
觶與賓主俱坐冠者升筵跪奠觶於薦東與進北面跪
取脯降自西階入見母進奠脯於席前退再拜出母不
在則使人受脯於西階下初冠者入見母賓主俱與賓
降當西序東面立主者降當東序西面立冠者出立於
西階東南面賓少進字之辭同士禮冠者再拜跪曰某
不敏夙夜祇承賓出主者送於內門外西向請禮從者
賓就次主者入初賓出冠者東面見諸親諸親拜之冠
者答拜冠者西向拜賓贊賓贊亦答拜見諸尊於別室
亦如之賓主既釋服入醴席一獻訖賓與衆賓出次立
於門東西面主者出揖賓賓報揖主者先入賓及衆賓
從之至階賓立於西階上主者立於東階上衆賓立於
西階下主者授幣篚於賓贊復位還阼階上北面拜送
賓贊降自西階主者送賓於大門外西面再拜而入孤

子則諸父諸兄戒賓冠之日主者紛而迎賓冠於阼階下其儀亦如之明日見廟冠者朝服入南門中庭道西北面再拜出

庶人冠禮古冠禮之存者惟士禮後世皆推而用之明洪武元年詔定冠禮下及庶人纖悉備具然自品官而降鮮有能行之者載之禮官備故事而已凡男子年十五至二十皆可冠將冠筮日筮賓戒賓俱如品官儀是日夙興張幄爲房於廳事東皆盛服設冠於阼階下東南陳服於房中西牖下席二在南酒在服北次幘頭巾帽各盛以盤三人捧之立於堂下西階之西南向東上

主人立於阼階下諸親立於壘東僎者立於門外以俟賓冠者雙紒袍勒帛素履待於房賓至主人出迎揖而人坐定冠者出於房執事者請行事賓之贊者取櫛總篋幘頭置於席南端賓揖冠者卽席西向坐贊者爲之櫛合紒施總加幘頭賓降主亦降立於阼階下賓盥主人揖讓升自西階復位執事者進巾賓降一等受之詣冠者席前東向祝詞同品官祝訖跪著巾興復位冠者興賓揖之入房易服深衣大帶出就冠席賓盥如初執事者進帽賓降二等受之進祝跪冠訖興復位揖冠者入房易服襴衫要帶出就冠席賓盥如初執事者進幘

頭賓降三等受之進祝跪冠訖與復位揖冠者入房易
公服出執事者徹冠席設醴席於西階南向贊者酌醴
出房立於冠者之南賓揖冠者即席西向立賓受醴詣
席前北面祝冠者拜受賓答拜執事者進饌冠者即席
坐飲食訖再拜賓答拜冠者離席立於西階之東南向
賓字之如品官詞冠者拜賓答拜冠者拜父母父母為
之起拜諸父之尊者遂出見鄉先生及父之執友先生
執友皆答拜賓退主人請禮賓固請乃人設酒饌賓退
主人酬賓贊侑以幣禮畢主人以冠者見於祠堂再拜
出

明史卷五十五 禮志第三十一

總裁官總理事務 經筵講官保兼太子太保保和殿大學士兼詹事府詹事加六級張廷玉等奉

敕修

禮九 嘉禮三

天子納后儀 皇太子納妃儀

親王昏禮 公主昏禮

品官昏禮 庶人昏禮

皇帝視學儀 經筵

日講 東宮出閣講學儀

諸王讀書儀

天子納后儀昏禮有六天子惟無親迎禮漢晉以來皆遣使持節奉迎其禮物儀文各以時損益明興諸帝皆卽位後行冊立禮正統七年英宗大婚始定儀注凡納采問名前期擇日遣官告天地宗廟至期設御座制案節案鹵簿綵輿中和大樂如儀禮部陳禮物於丹陛上及文樓下質明皇帝冕服陞座百官朝服行禮訖各就位正副使朝服四拜執事舉制案節案由中門出禮物隨之俱置丹陛中道傳制官宣制曰茲選某官某女爲皇后命卿等持節行納采問名禮正副使四拜駕輿舉制節案由奉天門中門出正副使取節及制書置綵輿

中儀仗大樂前導出大明門釋朝服乘馬行詣皇后第第中設使者幕次於大門外左南向設香案於正堂設制節案於南別設案於北使者至引禮導人幕次執事官陳禮物於正堂使者出次奉制書於案禮官先人立於東主婚朝服出立於西禮官曰奉制建后遣使行納采問名禮引主婚者出迎使者捧制書及節主婚者隨至堂置制書及節於案正副使分立案左右主婚者四拜詣案前跪正使取納采制宣曰朕承天序欽紹鴻圖經國之道正家爲本夫婦之倫乾坤之義實以相宗祀之敬協奉養之誠所資惟重祇遵聖母皇太后命遣使

持節以禮采擇宣訖授主婚者主婚者授執事者置於北案上稍左副使取問名制宣曰朕惟夫婦之道大倫之本正位乎內必資名家特遣使持節以禮問名尚佇來聞宣訖授如前置案上稍右主婚者俯伏與執事舉表案以表授主婚者主婚者跪授正使表曰臣某伏承嘉命正使某官某等重宣制詔問臣名族臣女臣夫婦所生先臣某官某之曾孫先臣某官某之孫先臣某官某之外孫臣女今年若干謹具奏聞主婚者俯伏與退四拜使者出置表綵輿中主婚者前曰請禮從者酒饌畢主婚者捧幣以勞使者使者出主婚者送至大門外

使者隨綵輿入大明門左門至奉天門外以表節授司禮監復命次納吉納徵告期傳制遣使竝如前儀但納徵用元纁束帛六馬穀圭等物制詞曰茲聘某官某女爲皇后命卿等持節行納吉納徵告期禮皇后第陳設如前惟更設玉帛案使者至以制書玉帛置案上六馬陳堂下執事先設皇后冠服諸物於正堂禮官入主婚者出迎執事舉玉帛案正使捧納吉納徵制書副使捧告期制書執節者捧節以次人各置於案主婚者四拜詣案前跪正使取制書宣曰大婚之卜龜筮師士協從敬循禮典遣使持節告吉又宣曰卿女有貞靜之德稱

母儀之選宜共承天地宗廟持遣使持節以禮納徵宣
訖授主婚者正副使又捧圭及元纁以授主婚者俱如
前儀副使取制書宣曰歲令月良吉日某甲子大婚維
宜持遣使持節以禮告期宣訖授如前儀主婚者四拜
使者持節出主婚者禮使者使者還復命如初次發冊
奉迎所司陳設如前儀禮部陳雁及禮物於丹陛上內
官監陳皇后鹵簿車輅於奉天門外制詞曰茲冊某官
某女爲皇后命卿等持節奉冊寶行奉迎禮正副使以
冊寶置綵輿中隨詣皇后第至門取制書冊寶置案上
禮官先入主婚者朝服出見禮官曰奉制冊后遣使持

節奉冊寶行奉迎禮主婚者出迎執事者舉案前行使
者捧制書及節執事者以雁及禮物從之至堂中各置
於案使者左右立主婚者四拜退立於西南女官以九
龍四鳳冠禕衣進皇后內官陳儀仗於中堂前設女樂
於堂下作止如常儀使者以節冊寶授司禮監官內贊
導入中堂皇后具服出閣詣香案前向闕立四拜贊宣
冊皇后跪宣冊官宣訖以授皇后皇后搢圭受冊以授
女官女官跪受立於西贊宣寶如宣冊儀贊出圭贊興
四拜訖皇后入閣司禮監官持節出授使者起受冊寶
禮畢主婚者詣案前跪正使取奉迎制宣訖授主婚者

副使進雁及禮物主婚者皆跪受如前儀主婚者與使者四拜出主婚者禮使者如初女官奏請皇后出閣自東階下立香案前四拜陞堂南向立主婚者進立於東西向日戒之敬之夙夜無違退立於東階母進立於西東向施衿結帨曰勉之敬之夙夜無違退立於西階內執事請乘輿皇后降階升輿導從出儀仗大樂前行次綵輿正副使隨次司禮監官擁導從大明門中門入百官朝服於承天門外班迎候輿入乃退皇后至午門外鳴鐘鼓鹵簿止正副使以節授司禮監復命授冊寶官捧冊寶儀仗女樂前導進奉天門至內庭幕次司禮監以冊寶授女官皇后出輿出西階進皇帝由東階降迎於庭揖皇后入內殿帝詣更服處具衮冕后詣更服處更禮服同詣奉先殿行謁廟禮祭畢還宮合卺帝更皮弁陞內殿后更衣從陞各陞座東西相向執事者舉饌案於前女官取四金爵酌酒以進既飲進饌復進酒進飯訖女官以兩盃酌酒合和以進既飲又進饌畢興易常服帝從者餽后之饌后從者餽帝之饌次日早帝后皆禮服候太后陞座帝后進座前宮人以殿脩盤立於后左帝后皆四拜執事舉案至宮人以殿脩盤授后后捧置於案女官舉案后隨至太后前進訖復位帝后皆

四拜三日早帝冕服后禮服同詣太后宮行八拜禮還宮帝服皮弁陞座女官導后禮服詣帝前行八拜禮后還宮陞座引禮導在內親屬及六尚等女官行八拜禮次各監局內官內使行八拜禮是日皇帝御奉天殿頒詔如常儀四日早皇帝服袞冕御華蓋殿親王八拜次執事官五拜遂陞奉天殿百官進表行慶賀禮是日太后及皇后各禮服陞座親王八拜出次內外命婦慶賀及外命婦進表箋皆如常儀五日行盥饋禮尚膳監具膳脩皇后禮服詣太后前四拜尚食以膳授皇后皇后捧膳進於案復位四拜退立於西南俟膳畢引出

皇太子納妃歷代之制與納后同隋唐以後始親迎天子臨軒醮戒宋始行盥饋禮明因之洪武元年定制凡行禮皆遣使持節如皇帝大婚儀納采問名制曰奉制納某氏女爲皇太子妃命卿等行納采問名禮至妃第僮者出詣使者前曰敢請事使者曰儲宮納配屬於令德邦有常典使某行納采之禮僮者入告主婚者曰臣某之子昧於壺儀不足以備采擇恭承制命臣某不敢辭僮者出告使者入陳禮物於庭宣制曰某奉詔采擇奠雁禮畢使者出僮者復詣使者前曰敢請事使者曰儲宮之配采擇既詣將加卜筮奉制問名僮者入告主

婚者曰制以臣某之女可以奉侍儲宮臣某不敢辭
者出告使者復入陳禮奠雁如儀宣制曰臣某奉詔問
名將謀諸卜筮主婚者曰臣某第幾女某氏出次納吉
賓者請事如前使者曰謀諸卜筮其占協從制使某告
吉賓者入告主婚者曰臣某之子蠢愚懼弗克堪卜筮
云吉惟臣之幸臣謹奉典制賓者出告使者入陳禮奠
雁如儀宣制曰奉制告吉又次納徵賓者出告使者入
陳玉帛禮物不奠雁宣制曰某奉制告成又次請期辭
曰詢於龜筮某月某日吉制使某告期主婚者曰敢不
承命陳禮奠雁如儀又次告廟遣使持節授冊寶儀注

悉見前又次醮戒皇帝服通天冠絳紗袍御奉天殿百
官侍立引進導皇太子至丹陛四拜入殿東門就席位
東向立司爵以餞進皇太子跪搢圭受醴祭酒司饌以
饌進跪受亦如之興就席坐飲食訖導詣御座前跪皇
帝命之曰往迎爾相承我宗事勗帥以敬皇太子曰臣
某謹奉制旨俯伏興出至丹陛四拜畢皇帝還宮皇太
子出又次親迎前一日有司設皇太子次於妃氏大門
外南向東宮官次於南東西相向至日質明東宮官具
朝服陳鹵簿鼓吹於東宮門外皇太子冕服乘輿出侍
衛導從如儀至宮門降輿升輅東宮官皆從至妃第回

轅南向降輅升輿至次降輿入就次東宮官皆就次先是皇太子將至主婚者設會宴女至期妃服褕翟花釵出就閣南面立傅姆立於左右主婚者具朝服立於西階之下引進導皇太子出次立於大門之東西向儻者朝服出立於門東曰敢請事引進跪啓訖皇太子曰某奉制親迎引進受命興承傳於儻者儻者入告導主婚者出迎於大門外之西東向再拜皇太子答拜引進導皇太子入門而左執雁者從儻者導主婚者入門而右皇太子陞東階進立於閣門戶前北向立主婚者升西階立於西東向引進啓奠雁執雁者以雁進皇太子受雁以授主婚者主婚者跪受興以授左右退立於西皇太子再拜降自東階出至次以伺主婚者不降送初皇太子入門妃母出立於閣門外奠雁位之西南向皇太子拜訖宮人傅姆導妃出立於母左主婚者命之曰戒之戒之夙夜恪勤母或違命母命之曰勉之勉之爾父有訓往承惟欽庶母申之曰恭聽父母之言宮人傅姆擎執導從妃乘輿出門降輿乘鳳轎皇太子揭簾訖遂升輅侍從如來儀至東宮門外降輅乘輿至閣降輿入俟於內殿門外之東西面司閨導妃詣內殿門外之西東面皇太子揖妃入行合巹禮如中宮儀又次朝見其

日妃詣內殿陛下候皇帝陞座司閨導妃入北面立再拜自西階升宮人奉棗栗盤進至御座前授妃妃奠於御前退復位再拜禮畢詣皇后前奉股脩盤如上儀又次醴妃次盥饋次謁廟次羣臣命婦朝賀皆如儀四年冊開平王常遇春女爲皇太子妃禮部上儀注太祖覽之曰贄禮不用笄但用金盤翟車用鳳轎雁以玉爲之古禮有親迎執綏御輪今用轎則揭簾是矣其合卺依古制用匏妃朝見入宮中乘小車以帷幕蔽之謁廟則皇太子俱往禮成後三日乃宴羣臣命婦著爲令成化二十二年更定婚禮凡節冊等案俱由奉天左門出皇

太子親迎由東長安門出親迎日妃服燕居服隨父母家廟行禮執事者具酒饌妃飲食訖父母坐堂上妃詣前各四拜父命之曰爾往大內夙夜勤慎孝敬無違母命之曰爾父有訓爾當敬承合卺前於皇太子內殿各設拜位皇太子揖妃入就位再拜妃四拜然後各升座廟見後百官朝賀致詞曰某官臣某等恭惟皇太子嘉禮旣成益綿宗社隆長之福臣某等不勝欣忭之至謹當慶賀帝賜宴如正旦儀命婦詣太后皇后前賀亦賜宴致詞曰皇太子嘉聘禮成益綿景福餘大率如洪武儀

親王婚禮唐制皇子納妃命親王主婚宋皆皇帝臨軒
醮戒略與皇太子同明因之其宣制曰冊某氏爲某王
妃納采致詞曰某王之儷屬於懿淑使某行納采禮問
名詞曰某旣受命將加諸卜筮奉制問名主婚者曰制
以臣某之子可以奉侍某王臣某不敢辭納吉辭曰卜
筮協從使某告吉主婚者曰臣某之子愚弗克堪卜祝
之吉臣與有幸謹奉典制納徵詞曰某王之儷卜旣協
吉制使某以儀物告成主婚者曰奉制賜臣以重禮臣
某謹奉典制請期詞曰某月一日涓吉制使某告期主婚
者曰謹奉命醮戒命曰往迎爾相用承厥家勗帥以敬

其親迎合褻朝見盥饋竝如皇太子盥饋畢王皮弁服
妃翟衣詣東宮前行四拜禮東宮坐受東宮妃立受二
拜答二拜王與妃至妃家妃父出迎王先入妃父從之
至堂王立於東妃父母立於西王四拜妃父母立受二
拜答二拜王中坐其餘親屬見王四拜王皆坐受妃入
中堂妃父母坐妃四拜其餘序家人禮太祖之世皇太
子皇子有二妃洪武八年十一月徵衛國公鄧愈女爲
秦王次妃不傳制不發冊不親迎正副使行納徵禮冠
服擬唐宋二品之制儀仗視正妃稍減婚之日王皮弁
服導妃謁奉先殿王在東稍前妃西稍後禮畢入宮王

與正妃正坐次妃詣王前四拜復詣正妃前四拜次妃東坐宴飲成禮次日朝見拜位如謁殿謁中宮不用棗栗服脩餘竝同

公主婚禮古者天子嫁女不自主婚以同姓諸侯主之故曰公主唐猶以親王主婚宋始不用惟令掌婚者於內東門納表則天子自爲主矣明因之凡公主出降行納采問名禮壻家備禮物表文於家庭望闕再拜掌婚者奉至內東門詣內使前曰朝恩既室於某官某之子某習先人之禮使臣某請納采以表跪授內使內使跪受奉進內殿執雁及禮物者從入內使出掌婚者曰將

凡下筮使臣某問名進表如初內使出曰有制掌婚者跪內使宣曰皇帝第幾女封某公主掌婚者俯伏興入就次賜宴出納吉儀與納采同掌婚者致詞曰加諸卜筮占曰從吉謹使臣某致告納徵壻家具元纁玉帛乘馬表文如儀掌婚者致詞曰朝恩既室於某官某之子某有先人之禮使臣某以束帛乘馬納徵請期詞曰某命臣某謹請吉日親迎曰壻公服告廟曰國恩既室於某以某日親迎致告將行父醮於廳隨意致戒壻再拜出至內東門內使延入次執雁及奉禮物者各陳於庭其日公主禮服辭奉先殿詣帝后前四拜受爵帝后

隨意訓戒受命訖又四拜降階內命婦送至內殿門外
公主陞輦至內東門降輦揭簾公主陞轎壻出欠立
執雁者以雁跪授壻壻受雁跪進於內使內使跪受以
授左右壻再拜先出乘馬還公主鹵簿車輅後發公侯
百官命婦送至府壻先候於門公主至壻揭簾公主降
同詣祠堂壻東公主西皆再拜進爵讀祝又再拜出詣
寢室壻公主相向再拜各就坐壻東公主西進饌合巹
如儀復相向再拜明日見舅姑舅姑坐於東西回公主
立於西東向行四拜禮舅姑答二拜第十日駙馬朝見
謝恩行五拜禮初洪武九年太祖以太師李善長子祺

爲駙馬都尉尚臨安公主先期告奉先殿下嫁前二日
命使冊公主冊後次日謁奉先殿又定駙馬受誥儀吏
部官捧誥命置龍亭至太師府駙馬朝服拜受次日善
長及駙馬謝恩後十日始請婚期二十六年稍更儀注
然儀注雖存其拜姑舅及公主駙馬相向拜之禮終明
之世實未嘗行也明年又更定公主郡主封號婚禮及
駙馬儀賓品秩弘治二年冊封仁和長公主重定婚儀
入府公主駙馬同拜天地行八拜禮堂內設公主座於
東西向駙馬東向座餘如前儀嘉靖二年工科給事中
安磐等言駙馬見公主行四拜禮公主坐受二拜雖貴

賤本殊而夫婦分定於禮不安不聽崇禎元年教習駙馬主事陳鍾盛言臣教習駙馬鞏永固駙馬黎明於府門外月臺四拜云至三月後則上堂上門上影壁行禮如前始視膳於公主前公主飲食於上駙馬侍立於旁過此方議成婚駙馬餽菓餽書臣公主答禮書賜皆大失禮夫既合昏則儼然夫婦安有跪拜數月稱臣侍膳然後成婚者會典行四拜於合昏之前明合昏後無拜禮也以天子館甥下同隸役豈所以尊朝廷帝是其言令永固卽擇日成婚凡選駙馬禮部榜諭在京官員軍民子弟年十四至十六容貌齊整行止端莊有家教者

報名司禮內臣於諸王館會選不中則博訪於畿內山東河內選中三人欽定一人餘二人送本處儒學充廩生自宣德時駙馬始有教習用學官爲之正統以後令駙馬赴監讀書習禮嘉靖六年始定禮部主事一人專在駙馬府教習
品官婚禮周制凡公侯大夫士之婚娶者用六禮唐以後儀物多以官品爲降殺明洪武五年詔曰古之婚禮結兩姓之歡以重人倫近世以來專論聘財習染奢侈其儀制頒行務從節儉以厚風俗故其時品節詳明皆有限制後克遵者鮮矣其制凡品官婚娶或爲子聘婦

皆使媒氏通書女氏許之擇吉納采主婚者設賓席至日具祝版告廟訖賓至女氏第主婚者公服出迎揖賓及媒氏入雁及禮物陳於廳賓左主右媒氏立於賓南皆再拜賓詣主人曰某官以伉儷之重施於某某率循典禮謹使某納采主婚者曰某之子弗嫻姆訓既辱采擇敢不拜嘉賓主西南相向坐徹雁受禮訖復陳雁及問各禮物賓興詣主婚者曰某官慎重婚禮將加卜筮請問名主婚者進曰某第幾女妻某氏出或以紅羅或以銷金紙書女之第行年歲賓辭主婚者請禮從者禮畢送賓至門外納吉如納采儀賓致詞曰某官承嘉命

稽諸卜筮龜筮協從使某告吉主婚者曰某未教之女既以吉告其何敢辭納徵如納吉儀加元纁束帛函書不用雁賓致詞曰某官以伉儷之重加惠某官率循典禮有不腆之幣敢請納徵主婚者曰某官既某以重禮某敢不拜受賓以函書授主婚者主婚者亦答以函書請期亦如納吉儀親迎日婿父告於禰廟婿北面再拜立父命之曰躬迎嘉偶釐爾內治婿進日敢不承命再拜媒氏導婿之女家其日女氏主婚者告廟訖體女如家人禮婿至門下馬就大門外之次女從者請女盛服就寢門內南向坐婿出次主婚者出迎於門外揖而入

主婚者入門而右婿入門而左執雁者從至寢戶前北面立主婚者立於戶東西向婿再拜奠雁出就次主婚者不降迎婿既出女父母南向坐保母導女四拜父命之日往之女家以順爲正無忘肅恭母命之日必恭必戒母違舅姑之命庶母申之已爾沈聽於訓言母作父母羞保母及侍女翼女出門升車儀衛導前送者乘車後婿先還以俟婦車至門出迎於門內揖婦入及寢門婿先升階婦從升入室婿盥於室之東南婦從者執巾進水以沃之婦盥於室之西北婿從者執巾進水以沃之盥畢各就座婿東婦西舉食案進酒進饌酒食訖復

進如初侍女以盪注酒進於婿婦前各飲畢皆興立於座南東西相向皆再拜婿婦入室易服婿從者餽婦之餘婦從者餽婿之餘明日見宗廟設婿父拜位於東階下婿於其後主婦拜位於西階下婦於其後諸親各序分立其日夙興婿父以下各就位再拜贊禮引婦至庭中北面立婿父升自東階詣酬位前跪三上香三祭酒讀祝興立於西婦四拜退復位婿父降自西階就拜位婿父以下皆再拜禮畢次見舅姑其日婦立堂下伺舅姑卽座就位四拜保母引婦升自西階至舅前侍女奉棗栗授婦婦進訖降階四拜詣姑前進殿脩如前儀

明史卷五十五
次舅姑醴婦如家人禮次盥饋其日婦家備饌至婿家
舅姑卽座婦四拜升自西階至舅前從者舉食案以饌
授婦婦進饌執事者加匕筯進饌於姑亦如之食訖徹
饌婦降階就位四拜禮畢舅姑再醴婦如初儀

庶人婚禮禮云婚禮下達則六禮之行無貴賤一也朱
子家禮無問名納吉止納采納幣請期洪武元年定制
用之下令禁指腹割衫襟爲親者凡庶人娶婦男年十
六女年十四以上竝聽婚娶婿常服或假九品服婦服
花釵大袖其納采納幣請期略倣品官之儀有媒無賓
詞亦稍異親迎前一日女氏使人陳設於婿之寢室俗

謂之鋪房至若告詞醮戒奠雁合巹竝如品官儀見祖
禰舅姑舅姑醴婦亦略相準

皇帝視學儀禮曰凡始立學者必釋奠於先聖先師周
未淪喪禮廢不行漢明帝始幸辟雍唐以後天子視學
始設講榻洪武十五年太祖將幸國子監議者言孔子
雖聖乃人臣禮宜一奠而再拜太祖不從命禮部尙書
劉仲質定其制前期設御幄於大成門東南向設御座
於彝倫堂至日學官率諸生迎駕於成賢街左皇帝入
御幄具皮弁服詣先師神位再拜獻爵復再拜四配十
哲兩廡分獻如常儀皇帝入御幄易常服升輿至彝倫

堂升座學官諸生五拜叩頭東西序立於堂下三品以上及侍從官以次入堂東西序立贊進講祭酒司業博士助教四人由西門入至堂中贊舉經案於御前禮部官奏請授經於講官祭酒跪受賜講官坐乃以經置講案叩頭就西南隅几榻坐講賜大臣翰林儒臣坐皆叩頭序坐於東西諸生圍立以聽講畢叩頭退就本位司業博士助教各以次進講出堂門復位贊宣制學官諸生列班俱北面跪聽宣諭五拜叩頭禮畢學官諸生出成賢街送駕明日祭酒率學官上表謝恩永樂四年禮部尚書鄭賜引宋制請服鞞袍再拜帝不從仍行四拜

禮進講畢賜百官茶禮部請立視學之碑帝親製文勒石祭酒等表謝帝御奉天門賜百官宴仍賜祭酒司業紵絲羅衣各二襲學官三十五人各紵絲衣一襲監生三千餘人各鈔五錠正統五年帝幸國子監如儀禮畢賜公侯伯駙馬武官都督以上文官三品以上及翰林學士至檢討國子監祭酒至學錄宴先是視學祭先師不設牲不奏樂至成化元年始用牲樂視學之日樂設而不作禮畢百官慶賀賜衣服賜宴皆及孔顏孟三氏子孫弘治元年定先期致齋一日奠加幣牲用太牢改分獻官爲分奠官嘉靖元年定衍聖公率三氏子孫祭

酒率學官諸生上表謝恩皆賜宴於禮部十二年以先
師祀典既正再視學命大臣致奠啓聖公祠萬曆四年
定次日行慶賀禮頒賞如舊免賜宴初憲宗取三氏子
孫赴京觀禮又命衍聖公分獻至世宗命衍聖公及顏
孟二博士孔氏老成者五人顏孟各二人赴京陪祀
經筵明初無定日亦無定所正統初始著爲常儀以月
之二日御文華殿進講月三次寒暑暫免其制勲臣一
人知經筵事內閣學士或知或同知尚書都御史通政
使大理卿及學士等待班翰林院春坊官及國子監祭
酒二員進講春坊官二員展書給事中御史各二員待

儀鴻臚寺錦衣衛堂上官各一員供事鳴贊一贊禮序
班四舉案勲臣或駙馬一人領將軍侍衛禮部擇吉請
先期設御座於文華殿設御案於座東稍南設講案於
案南稍東是日司禮監先陳所講四書經史各一冊置
御案一冊置講案皆四書東經史西講官各撰講章置
冊內帝升座知經筵及侍班等官於丹陛上五拜三叩
頭後每講止
行叩頭禮以次上殿東西序立序班二員舉御案於
座前二員舉講案置御案南正中鴻臚官贊進講講官
二員從東西班出詣講案前北向竝立東西展書官各
至御案南銅鶴下相向立鴻臚官贊講官拜興東班展

書官詣御案前跪展四書退立於東鶴下講官至講案前立奏講某書講畢退展書官跪掩書仍退立鶴下西班展書官展經或史講官進講退如初鴻臚官贊講官拜興各退就東西班展書官隨之序班徹御案講案禮畢命賜酒飯各官出至丹陛行叩頭禮至左順門酒飯畢入行叩頭禮隆慶元年定先一日告奉先殿告几筵是日帝詣文華殿左室展禮先聖先師講章於前兩日先進呈覽萬曆二年定春講以二月十二日起至五月初二日止秋講以八月十二日起至十月初二日止不必題請

日講御文華穿殿止用講讀官內閣學士侍班不用侍儀等官講官或四或六開讀初吉服五拜三叩首後常服一拜三叩首閣臣同侍於殿內候帝口宣先生來同進叩首東西立讀者先至御前一揖至案展書壓金尺執牙籤讀五過掩書一揖退先書次經次史進講如讀儀侍書官侍習書畢各叩頭退於文華殿賜茶文華門賜酒飯午講隆慶六年定每日早講畢帝進煖閣少憩閱章奏閣臣等退西廂房久之率講官再進午講講通鑑節要及貞觀政要講畢帝還宮凡三六九視朝日暫免講讀又嘉靖六年定制月三八日經筵日講官二員

明史卷五十五
講大學衍義十年定無逸殿講儀質明帝常服乘輦至殿門衆官於門外迎候帝降輦乘板輿至殿升座各官於殿門外一拜三叩首入內東西序立贊進講講官大學士一員出班叩首命賜坐一叩首乃坐講畢展書官跪掩講章講官叩頭復班又學士一員承旨坐講如初禮畢各官至幽風亭候駕至亭內賜宴

東宮出閣講學儀太祖命學士宋濂授皇太子諸王經於大本堂後於文華後殿世宗改爲便殿遂移殿東廂天順二年定出閣儀是日早侍衛侍儀如常執事官於文華後殿四拜鴻臚官請皇太子升殿師保等官於丹

陛上四拜各官退出內侍導皇太子至後殿升座以書案進侍班侍讀講官入分班東西立內侍展書侍讀講官以次進讀講叩頭而退其每日講讀儀早朝退後皇太子出閣升座不用侍衛等官惟侍班侍讀講官入行叩頭禮內侍展書先讀四書則東班侍讀官向前伴讀一數遍退復班次讀經或史則西班伴讀亦如之讀畢各官退至巳時各官入內侍展書侍講官講早所讀四書畢退班次講經史亦然講畢侍書官侍習寫字寫畢各官叩頭退凡讀書三日後一溫背讀成熟溫書之日不授新書凡寫字春夏秋日百字冬日五十字凡朔望

節假及大風雨雪隆寒盛暑則暫停弘治十一年更定
二師三少并宮僚於丹陛四拜畢從殿左右門入東西
立候講讀畢叩頭退隆慶六年改設皇太子座於文華
殿之東廂正中西向每日講讀各官先詣文華門外東
西向序立候帝御日講經筵畢皇太子出閣升座凡東
宮初講時閣臣連侍五日後每月三八日一至先拜出
然後各官入崇禎十一年署禮部事學士顧錫疇言東
宮嘉禮告成累朝錫賚有據實錄載成化十五年皇太
子出閣講學六卿皆加保傅弘治十年皇太子出閣講
學內閣徐溥等四人尚書馬文升等七人俱加宮保帝

命酌議行之

諸王讀書儀書堂在皇極門右廂講官選部曹或進士
改授翰林官充之天順二年定初入書堂其日早王至
右順門之北書堂面東中坐提督講讀并講讀官行四
拜禮內官捧書展於案上就案左坐講讀官進立於案
右伴讀十遍叩頭退每日講讀清晨王至書堂講讀官
行叩頭禮伴讀十遍出飯後復詣堂伴看寫字講書畢
仍叩頭退萬曆六年定書堂設中座書案在左寫字案
在右輔臣率講讀侍書官候於門外王入書堂傳令旨
先生進輔臣率各官入四拜分班侍立講讀官以次授

書各十遍訖令旨先出喫酒飯各官出王暫入堂南間少憩輔臣各率官入令旨先生進遂入分班侍立侍書官看寫字講讀以次進講畢各官一拜出

待御門之北書堂兩東中坐設椅榻於殿前左右侍御林官末之牙牌二排坐侍人書堂其日早至前王前書翰書堂山皇御門內佩帶官懸帶書處士命之書翰之正終

明史卷五十六

志第三十二

總裁寫理事務 經筵講官保英子太僕保和學士兼詹事府詹事加級張廷玉等

救修

禮十 嘉禮四 賓禮

巡狩 嘉禮四 賓禮

皇長孫監國 東宮監國

迎接詔赦儀 頒詔儀

進表箋儀 進書儀

蕃王朝貢禮 鄉飲酒禮

蕃國遣使進表儀 遣使之蕃國儀

品官相見禮

庶人相見禮

巡狩之制永樂六年北巡禮部行直省凡有重事及四夷來朝與進表者俱違行在所小事達京師啟聞車駕將發奏告天地社稷太廟孝陵祭大江旗纛等神輶祭於承天門緣塗當祭者遣官祭將至北京設壇祭北京山川等神車駕至奏告天地祭境內山川扈從馬步軍五萬侍從五府都督各一吏戶兵刑四部堂上官各一禮工二部堂上官各二都察院堂上官 御史二十四給事中十九通政大理太常光祿鴻臚堂上官共二十翰林院內閣官三侍講修撰典籍等官六六部郎官共

五十四餘不具載車駕將發宴郡臣賜扈從官及軍校鈔至北京宴羣臣耆老賜百官及命婦鈔所過郡縣官吏生員耆老朝覲分遣廷臣覈守令賢否卽加黜陟給事御史存問高年賜幣帛酒肉嘉靖十八年幸承天先期親告上帝於元極寶殿同日告皇祖及睿宗廟遣官分告北郊及成祖以下諸廟社稷日月神祇駕出正陽門后妃輦轎從錦衣衛設欽製武陣駕衛卒八千奉輿輦執儀仗衛指揮前驅武重臣二員留守兵部尚書參贊機務各賜敕行事分命文武重臣出督宣大薊州山海關行九邊亦各賜敕皇城及京城諸門皆命文武大

臣各一員坐守設警備扈駕官軍六千駕發百官吉服送於彰儀門外扈從官軍畧如永樂時數先發在塗者免朝參惟禮兵二部鴻臚太常科道糾儀官及光祿寺從行過真定望祭北嶽帝常服從臣大臣及巡撫都御史吉服行禮衛輝遣官祭濟瀆鈞州望祭中嶽榮澤祭河禮如北嶽南陽遣祭武當山塗次古帝王聖賢忠臣烈士祠墓遣官致祭撫按三司迎於境上至行宮吉服朝見生員耆老俱三十里外迎所過王府親王常服候駕隨至行宮冕服朝見賜宴宗室不許出至承天詣獻皇帝廟謁告越四日行告天禮於龍飛殿丹陛上奉獻

皇帝配更皮弁服詣國社稷及山川壇行禮次日謁顯陵次日從駕官上表賀遂頒詔如儀回京親謝上帝皇祖皇考分遣官告郊廟社稷羣臣行禮如初
東宮監國古制太子出曰撫軍守曰監國三代而下惟唐太子監國結雙龍符而其儀不著永樂七年駕幸北京定制凡常朝皇太子於午門左視事左右侍衛及各官啟事如常儀若御文華殿承旨召入者方入凡內外軍機及王府急務悉奏請有邊警卽調軍勦捕仍馳奏行在皇城及各門守衛皆增置官軍遇聖節正旦冬至皇太子率百官於文華殿前拜表行十二拜禮表由中

門出皇太子由左門送至午門還宮百官導至長安右門外文五品武四品以上及近侍官監察御史俱乘馬導至三山門外以表授進奏官至期告天祝壽行八拜禮其正旦冬至千秋節百官於文華殿慶賀如常儀凡享太廟及社稷諸神之祭先期敕皇太子攝祭其祀典神祇太常寺於行在奏聞遣官行禮凡四夷來朝循例賜宴命禮部遣送行在所凡詔書至設龍亭儀仗大樂百官朝服出三山門外奉迎皇太子冕服迎於午門前至文華殿行五拜三叩頭禮升殿展讀使者捧詔置龍亭中皇太子送至午門外禮部官置詔書雲輿中文武

二品以上官迎至承天門開讀如儀以鼓樂送使者前會同館使者見皇太子行四拜禮賜宴於禮部十二年北征復定制常朝於文華殿視事文武啟事俱達北京嘉靖十八年南巡命皇太子監國時太子幼命輔臣一人居守軍國機務悉聽啟行皇太孫監國永樂八年帝自北京北征時皇太子已監國於南乃命皇長孫居北京監國時宣宗未冠及冠始加稱皇太孫云其制每日皇長孫於奉天門左視事侍衛如常儀諸司有事具啟施行若軍機及王府要務一啟皇太子處分一奏聞行在所聖節設香案於奉天殿

行禮如常儀天下諸司表文俱詣北京四夷朝貢俱送南京武選及官民有犯大者啟皇太子小者皇長孫行之皇親有犯啟皇太子所犯情重及謀逆者即時拘執命皇親會問不服乃命公侯伯五府六部都察院大理寺會皇親再問啟皇太子候車駕回京奏請處分頒詔儀凡頒命四方有詔書有赦書有敕符丹符有制諭手詔詔赦先於闕廷宣讀然後頒行敕符等則使者齎付所授官秘不敢發開讀迎接儀各不同洪武二十六年定頒詔儀設御座於奉天殿設寶案於殿東陳中韶樂於殿內設大樂於午門及承天門外設宣讀案

於承天門上西南向清晨校尉擎雲蓋於殿內簾前百官朝服班承天門外公侯班午門外東西向皇帝皮弁服升殿如儀禮部官捧詔書詣案前用寶訖置雲蓋中校尉擎雲蓋由殿東門出大樂作自東陞降由奉天門至金水橋南午門外樂作公侯前導迎至承天門上鳴贊唱排班文武官就位樂作四拜樂止宣讀展讀官升案稱有制眾官跪禮部官捧詔書授宣讀官宣訖禮部官捧置雲蓋中贊禮唱俯伏興樂作四拜樂止舞蹈山呼又四拜儀禮司奏禮畢駕興禮部官捧詔書分授使者百官退嘉靖六年續定鴻臚官設詔案錦衣衛設雲

明倫彙編 禮儀典 卷五十七
蓋盤於奉天殿內東別設雲盤於承天門上設綵輿於
午門外鴻臚官設宣讀案於承天門上百官入丹墀侍
立帝冕服升座如朝儀翰林院官捧詔書從至御座前
東立百官入班四拜出至承天門外贊頒詔翰林院官
捧詔書授禮部官捧至雲盤案上校尉擎雲蓋俱從殿
左門出至午門外捧詔置綵輿內公侯伯三品以上官
前導迎至承天門上宣讀贊拜俱如上儀禮部官捧詔
書授錦衣衛官置雲匣中以綵索繫之龍竿頒降禮部
官捧置龍亭內鼓樂迎至禮部授使者頒行隆慶六年
詔出至皇極門卽奏禮畢駕還

迎接詔赦儀洪武中定凡遣使開讀詔赦本處官具龍
亭儀仗鼓樂出郭迎使者下馬奉詔書置龍亭中南向
本處官朝服行五拜禮衆官及鼓樂前導使者上馬隨
龍亭後至公廨門衆官先入文武東西序立候龍亭至
排班四拜使者捧詔授展讀官展讀官跪受詣開讀案
宣讀訖捧詔授朝使仍置龍亭中衆官四拜舞蹈山呼
復四拜畢班首詣龍亭前跪問皇躬萬福使者鞠躬答
曰聖躬萬福衆官退易服見使者竝行兩拜禮復具鼓
樂送詔於官亭如有出使官在則先守臣行禮
進書儀惟實錄最重皇帝具袞冕百官朝服進表稱賀

其餘纂修書成則以表進重錄書及玉牒止捧進茲詳載進實錄儀餘可推見云建文時太祖實錄成其進儀無考永樂元年重修太祖實錄成設香案於奉天殿丹陛正中表案於丹陛之東設寶輿於奉天門設鹵簿大樂如儀史官捧實錄置輿中帝御殿如大朝儀百官詣丹墀左右立鴻臚官引寶輿至丹陛上史官舉實錄置於案遂入班鴻臚官奏進實錄序班舉實錄案以次由殿中門入班首由左門入帝與序班以實錄案置於殿中班首跪於案前贊史官皆跪序班并內侍官舉實錄案入謹身殿置於中帝復座贊俯伏班首俯伏與復位

贊四拜贊進表序班舉表案由左門入置於殿中贊宣表贊衆官皆跪宣訖俯伏與四拜進實錄官退於東班百官入班鴻臚官奏慶賀各官四拜興贊有制史官仍入班贊跪宣制云太祖高皇帝高皇太后功德光華纂述詳實朕心懽慶與卿等同之宣訖俯伏與三舞蹈又四拜禮畢萬曆五年世祖實錄成績定進儀設寶輿香亭表亭於史館前帝袞冕御中極殿百官朝服侍班監修總裁纂修等官朝服至館前監修官捧表置表亭中纂修官捧實錄置寶輿中鴻臚官導迎用鼓樂繖蓋由會極門下階至橋南由中道行監修總裁等官隨表亭後

由二橋行至皇極門實錄輿由中門入表亭由左門入
至丹墀案前監修官捧表置於案纂修官捧實錄置於
案俱侍立於石墀東內殿百官行禮訖帝出御皇極殿
監修總裁等官入進實錄進表俱如永樂儀次日司禮
監官自內殿送實錄下殿仍置寶輿中用繖蓋與監修
總裁官同送皇史宬尊藏

進表箋儀明初定制凡王府遇聖節及冬至正旦先期
陳設畢王冕服就位四拜詣香案前跪進表訖復位四
拜三舞蹈山呼又四拜百官朝服隨班行禮進中宮箋
儀如之惟不舞蹈山呼進皇太子箋王皮弁服行八拜

禮百官朝服隨班行禮凡一賀表箋皇子封王者於天
子前自稱曰第幾子某王某稱天子曰父皇陛下皇后
曰母后殿下若孫則自稱曰第幾孫某王某稱天子曰
祖父皇帝陛下皇后曰祖母皇后殿下若弟則自稱曰
第幾弟某封某稱天子曰大兄皇帝陛下皇后曰尊嫂
皇后殿下姪則自稱曰第幾姪某封某稱天子曰伯父
皇帝陛下叔父皇帝陛下皇后曰伯母皇后殿下叔母
皇后殿下若尊屬則自稱曰某封臣某稱天子曰皇帝
陛下皇后曰皇后殿下若從孫以下則稱從孫再從孫
三從孫某封某皆稱皇帝皇后曰伯祖叔祖皇帝陛下

明史卷五十七
志
伯祖母叔祖母皇后殿下至世宗時始令各王府表箋俱用聖號不得用家人禮凡在外百官進賀表箋前一日結綵於公廨及街衢文武官各齋沐宿本署清晨設龍亭於庭中設儀仗鼓樂於露臺設表箋案於龍亭前香案於表箋案前設進表箋官位於龍亭東鼓初嚴各官具服次嚴班首具服詣香案前跪用印訖以表箋置於案退立幕次三嚴各官入班四拜班首詣香案前贊跪眾官皆跪執事者以表箋跪受班首班首跪授進表官進表官跪受置龍亭中班首復位各官皆四拜三舞蹈山呼四拜金鼓儀仗鼓樂百官前導進表官在龍

亭後東至郊外置龍亭南向儀仗鼓樂陳列如前文武官侍立班首取表箋授進表官進表官就於馬上受表即行百官退
鄉飲酒禮記曰鄉飲酒之禮廢則爭鬪之獄繁矣故儀禮所記惟鄉飲之禮達於庶民自周迄明損益代殊而其禮不廢洪武五年詔禮部奏定鄉飲禮儀命有司與學官率士大夫之老者行於學校民間里社亦行之十六年詔班鄉飲酒禮圖式於天下每歲正月十五日十月初一日於儒學行之其儀以府州縣長吏爲主以鄉之致仕官有德行者一人爲賓擇年高有德者爲僕賓

其次爲介又其次爲三賓又其次爲衆賓敎職爲司正
贊禮贊引讀律皆使能者前期設賓席於堂北兩楹之
間少西南面主席於阼階上西面介席於西階上東面
俱席於賓東南面三賓席於賓西南面皆專席不屬衆
賓六十以上者席於西序東面北上賓多則設席於西
階北面東上僚佐席於東序西面北上設衆賓五十以
下者位於堂下西階之西當序東面北上賓多則又設
位於西階之南北面東上司正及讀律者位於堂下阼
階之南北面西上設主之贊者位於阼階之東西面北
上設主及僚佐以下次於東廊賓介及衆賓次於庠門
之外僎次亦在門外設酒尊於堂上東南隅加勺罍用
葛巾爵洗於阼階下東南篚一於洗西實以爵罋盥洗
在爵洗東設卓案於堂上下席位前陳豆於其上六十
者三豆七十者四豆八十者五豆九十者六豆堂下者
二豆主人豆如賓之數皆實以菹醢至期賓將及門執
事者進報曰賓至主人率僚屬出迎於門外主西面賓
以下皆東面三揖三讓而後升堂相向再拜升坐執事
者報僎至迎坐如前儀贊禮唱司正揚觶司正詣盥洗
位次詣爵洗位取觶於篚洗解升自西階詣尊所酌酒
進兩楹之間北面立而坐者皆起司正揖僎賓以下皆

報揖司正乃舉解言曰恭惟朝廷率由舊章敦崇禮教
舉行鄉飲非爲飲食凡我長幼各相勸勉爲臣竭忠爲
子盡孝長幼有序兄友弟恭內睦宗族外和鄉里無或
廢墜以忝所生言畢贊禮唱司正飲酒飲畢揖報如初
司正復位僎賓以下皆坐贊禮唱讀律令執事舉律令
案於堂之中讀律令者詣案前北向立讀皆如揚解儀
有過之人俱赴正席立聽讀畢復位贊禮唱供饌執事
者舉饌案至賓前次僎次介次主三賓以下各以次舉
訖贊禮唱獻賓主降詣盥洗及爵洗位洗爵酌酒至賓
前置於席稍退兩拜賓答拜又詣僎前亦如之主退復

位贊禮唱賓酬酒賓起僎從之詣盥洗爵洗位如儀至
主前置爵賓僎主皆再拜各就坐執事者於介三賓衆
賓以下以次斟酒訖贊禮唱飲酒或三行或五行供湯
三品畢贊禮唱徹僎在坐者皆興僎主僚屬居東賓介
三賓衆賓居西皆再拜贊禮唱送賓以次下堂分東西
行仍三揖出庠門而退里中鄉飲畧同二十二年命凡
有過犯之人列於外坐同類者成席不許雜於善良之
中著爲令
三曰賓禮以待蕃國之君長與其使者宋政和間詳定
五禮取周官同儀掌九儀賓客擯相詔王南鄉以朝諸

明史卷五十六 禮志 二
侯之義故以朝會儀列爲賓禮按古之諸侯各君其國
子其民待以客禮可也不可與後世之臣下等茲改從
其舊而百官庶人相見之禮附焉

蕃王朝貢禮蕃王入朝其迎勞宴饗之禮惟唐制爲詳
宋時蕃國皆遣使入貢所接見惟使臣而已明洪武二
年定制凡蕃王至龍江驛遣侍儀通贊二人接伴館人
陳蕃王座於廳西北東向應天府知府出迎設座於廳
東南西向以賓主接見宴畢知府還蕃王送於門外明
日接伴官送蕃王入會同館禮部尚書卽館宴勞尚書
至蕃王服其國服相見宴饗迎送俱如龍江驛酒行用

樂明日中書省奏聞命官一員詣館如前宴勞侍儀司
以蕃王及從官具服於天界寺習儀三日擇日朝見設
蕃王及從官次於午門外蕃王拜位於丹墀中道稍西
從官在其後設方物案於丹墀中道東西知班二位於
蕃王拜位北引蕃王舍人二位於蕃王從官北鼓三嚴
百官入侍執事舉方物案蕃王隨案由西門入至殿前
丹墀西侯立皇帝服通天冠絳紗袍御殿蕃王及從官
各就拜位以方物案置拜位前贊四拜訖引班導蕃王
升殿宣方物官以方物狀由西陛升入殿西門內贊引
至御前贊拜蕃王再拜跪稱賀致詞宣方物官宣狀承

制官宣制訖蕃王俯伏興再拜出殿西門復位贊拜蕃王及其從官皆四拜禮畢皇帝興蕃王以下出樂作樂止皆如常見皇太子於東宮正殿設拜位於殿外皇太子皮弁服升座蕃王再拜皇太子立受蕃王跪稱賀致詞訖復位再拜皇太子答拜蕃王出其從官行四拜禮見親王東西相向再拜王答拜俱就座王座稍北禮畢揖而出見丞相三公大都督御史大夫皆鈞禮蕃王陛辭如朝見儀不傳制中書省率禮部官送至龍江驛宴如初二十七年四月以舊儀煩命更定凡蕃國來朝先遣禮部官勞於會同館明日各具其國服如嘗賜朝服

者則服朝服於奉天殿朝見行八拜禮畢即詣文華殿朝皇太子行四拜禮見親王亦如之王立受答後三拜從官隨蕃王後行禮凡遇宴會蕃王居侯伯之下凡蕃國遣使朝貢至驛遣應天府同知禮待明日至會同館中書省奏聞命禮部侍郎於館中禮待如儀宴畢習儀三日擇日朝見陳設儀仗及進表俱如儀承制官詣使者前稱有制使者跪宣制曰皇帝問使者來時爾國王安否使者答畢俯伏興再拜承制官稱有後制使者跪宣制曰皇帝又問爾使者遠來勤勞使者俯伏興再拜承制官復命訖使者復四拜禮畢皇帝興樂作止如儀

見東宮四拜進方物訖復四拜謁丞相大都督御史大夫再拜獻書復再拜見左司郎中等皆鈞禮凡錫宴陳御座於謹身殿設皇太子座於御座東諸王座於皇太子下西向設蕃王座於殿西第一行東向設文武官座於第二第三行東西向酒九行上食五次大樂細樂間作呈舞隊蕃國從官坐於西廡下酒數食品同不作樂東宮宴蕃王殿上正中設皇太子座設諸王座於旁東西向蕃王座於西偏諸王之下東向三師賓客論德位於殿上第二行東西向蕃王從官及東宮官位於西廡東向北上和聲郎陳樂光祿寺設酒饌俱如謹身殿儀

或宰相請旨宴學則設席於中書省後堂賓西主東設蕃王從官及左右司官坐於左司教坊司陳樂於堂及左司南楹蕃王至省門外省官迎入從官各從其後升階就坐酒七行食五品作樂雜陳諸戲宴畢省官送至門外都督府御史臺宴如之其宴蕃使禮部奉旨錫宴於會同館館人設坐次及御酒案教坊司設樂舞禮部官陳龍亭於午門外光祿寺官請旨取御酒置龍亭儀仗鼓樂前導至館蕃使出迎於門外執事者捧酒由中道入置酒於案奉旨官立於案東稱有制使者望闕跪聽宣畢贊再拜奉旨官酌酒授使者北面跪飲畢又再

拜各就坐酒七行湯五品作樂陳戲如儀宴畢奉旨官
出使者送至門外皇太子錫宴則遣宮官禮待之省府
臺亦置酒宴會酒五行食五品作樂不陳戲

遣使之蕃國儀凡遣使賜璽綬及問遣慶弔自漢始唐
使外國謂之入蕃使宋謂之國信使明祖既定天下分
遣使者奉詔書往諭諸國或降香幣以祀其國之山川
撫柔之意甚厚而不傷國體視前代爲得凡遣使翰林
院官草詔至期陳設如常儀百官入侍皇帝御奉天殿
禮部官捧詔書尚寶司奏用寶以黃銷金袂裏置盤中
置於案使者就拜位四拜樂作止如儀承制官至丹陛

稱有制使者跪宣制曰皇帝敕使爾某詔諭某國爾宜
恭承朕命宣訖使者俯伏興四拜禮部官奉詔降自中
陛以授使者使者捧出午門置龍亭內駕輿百官出使
者入蕃國境先遣人報於王王遣使遠接前期於國門
外公館設幄結綵陳龍亭香案備金鼓儀仗大樂又於
城內街巷結綵設闕亭於王殿上設香案於其前設捧
詔官位殿陛之東北宣詔展詔官以次南俱西向詔使
至迎入館王率國中官及耆老出迎於國門外行五拜
禮儀仗鼓樂導龍亭入使者隨之至殿上置龍亭於正
中使者立香案東蕃王位殿庭中北向衆官隨之使者

南向立稱有制蕃王以下皆四拜蕃王升自西階詣香案前跪三上香俯伏興衆官同蕃王復位使者詣龍亭前取詔書授捧詔官捧詔官捧詣開讀案授宣詔官宣詔官受詔展詔官對展蕃王以下皆跪聽宣訖仍以詔置龍亭蕃王以下皆俯伏興四拜三舞蹈復四拜凡拜皆作樂禮畢使者以詔書付所司頒行蕃王與使者分賓王行禮其賜蕃王印綬及禮物宣制曰皇帝敕使爾某授某國王印綬爾其恭承朕命至蕃國宣制曰皇帝敕使某持印賜爾國王某并賜禮物餘如儀

巷結綵設闕庭於殿上正中前設表箋案又前設香案使者位於香案東捧表箋二人於香案西設龍亭於殿庭南正中儀仗鼓樂具備清晨司印者陳印案於殿中滌印訖以表箋及印俱置於案王冕服衆官朝服詣案前用印畢用黃袱裹表紅袱裹箋各置於匣中仍各以黃袱裹之捧表箋官捧置於案引禮引王至殿庭正中衆官位其後贊拜樂作再拜樂止王詣香案前跪衆官皆跪三上香訖捧表官取表東向跪進王王授表以進於使者使者西向跪受興置於案贊興王復位贊拜樂作王與衆官皆四拜樂止禮畢捧表箋官捧表前行置

明史卷五十六
志
於龍亭中金鼓儀仗鼓樂前導王送至宮門外還衆官朝服送至國門外使者乃行

品官相見禮凡官員揖拜洪武二十年定公侯駙馬相見各行兩拜禮一品官見公侯駙馬一品官居右行兩拜禮公侯駙馬居左答禮二品見一品亦如之三品以下倣此若三品見一品四品見二品行兩拜禮一品二品答受從宜餘品倣此如有親戚尊卑之分從行私禮三十年令凡百官以品秩高下分尊卑品近者行禮則東西對立卑者西高者東其品越二三等者卑者下尊者上其越四等者則卑者拜下尊者坐受有事則跪白

凡文武官公聚各依品級序坐若資品同者照衙門次第若王府官與朝官坐立各照品級俱在朝官之次成化十四年定在外總兵巡撫官位次左右都督與左右都御史並都督同知與副都御史並都督僉事與僉都御史並俱文東武西伯以上則坐於左十五年重定都御史係總督及提督軍務者不分左右副僉俱坐於左總兵官雖伯亦坐於右凡官員相遇迴避洪武三十年定駙馬遇公侯分路而行一品二品遇公侯駙馬引馬側立須其過二品見一品趨右讓道而行三品遇公侯駙馬引馬迴避遇一品引馬側立遇二品趨右讓道而

行四品遇一品以上官引馬迴避遇二品引馬側立遇三品趨右讓道而行五品至九品皆視此遞差其後不盡遵行文職雖一命以上不避公侯勳戚大臣而其相迴避者亦論官不論品秩矣凡屬官見上司洪武二十年定屬官序立於堂階之上總行一揖上司拱手首領官答揖其公幹節序見上司官皆行兩拜禮長官拱手首領官答禮凡官員公座洪武二十年定大小衙門官員每日公座行肅揖禮佐貳官揖長官長官答禮首領官揖長官佐貳官長官佐貳官拱手洪武五年令凡鄉黨序齒民間士農工商庶人相見禮洪武五年令凡鄉黨序齒民間士農工商人等平居相見及歲時宴會謁拜之禮幼者先施坐次之列長者居上十二年令內外官致仕居鄉惟於宗族及外祖妻家序尊卑如家人禮若筵宴則設別席不許坐於無官者之下與同致仕官會則序爵爵司序齒其與異姓無官者相見不須答禮庶民則以官禮謁見凌侮者論如律二十六年定凡民間子孫弟姪甥婿見尊長生徒見其師奴婢見家長久別行四拜禮近別行揖禮其餘親戚長幼悉依等第久別行兩拜禮近別行揖禮平交同

禮平交同
 聖主特賜朕是也
 朕昔嘗於會
 處此對朕其誠
 再養命則時二十六年
 與吳叔黑有言所以
 坐外然其言亦不
 又似御裴宗孔會
 之既具善焉上十二
 人善平氣朕見其

明史卷五十七 禮志第三十三

之節 總裁官總理事務
 經筵講官保兼太子太保
 大學兼管書局書事加
 敘張廷玉

救修舊典未衣間行焉
 朕朕最親朕親朕
 禮古一軍禮

朕朕最親朕親朕
 禮古一軍禮

朕朕最親朕親朕
 禮古一軍禮

朕朕最親朕親朕
 禮古一軍禮

朕朕最親朕親朕
 禮古一軍禮

朕朕最親朕親朕
 禮古一軍禮

朕朕最親朕親朕
 禮古一軍禮

四日軍禮親征為首遣將次之方出師有禡祭之禮及

還有受降奏凱獻俘論功行賞之禮平居有閱武大射之禮而教日伐鼓之制亦以類附焉

親征洪武元年閏七月詔定軍禮中書省臣會儒臣言古者天子親征所以順天應人除殘去暴以安天下自黃帝習用干戈以征不享此其始也周制天子親征則類於上帝宜於大社造於祖廟禡於所征之地及祭所過山川師還則奏凱獻俘於廟社後魏有宣露布之制唐仍舊典宋亦間行焉於是歷考舊章定爲親征禮奏之前期擇日祭告天地宗社皇帝服武弁乘革輅備六軍具牲幣作樂皆行三獻禮其儀與大祀同又於國南

神祠行禡祭禮凡所過山川嶽鎮海瀆用太牢其次少牢又次特牲若行速止用酒脯祭器籩豆各一前期齋三日皇帝服通天冠絳紗袍省牲視滌祭之日服武弁行一獻禮凱旋告祭宗社禮與出師同獻俘廟社以露布詔天下然後論功行賞永樂宣德正統間率遵用之正德十四年帝親征宸濠禮部上祭告儀注如舊帝令祭祀俱遣官代及疏請遣官有旨勿遣其頒詔亦如舊制明年十一月將凱旋禮臣言宸濠悖逆皇上親統六師往正其罪與宣德間親征漢庶人高煦故事相同但一切禮儀無從稽考請於師還之日聖駕從正陽門入

遣官告謝天地廟社駕詣奉先殿几筵殿謁見畢朝見
皇太后次日早御午門樓百官朝見行獻俘禮擇日詔
告天下十二月帝還京百官迎於正陽門外帝戎服乘
馬入

遣將洪武元年中書省臣會官議奏王者遣將所以討
有罪除民害也書稱大禹徂征詩美南仲薄伐史記引
兵書曰古王者之遣將跪而推轂漢高命韓信爲將設
壇具禮北齊親授斧鉞唐則告於廟社又告太公廟宋
則授旌節於朝堂次告廟社又禱祭黃帝今定遣將禮
皇帝武弁服御奉天殿大將軍入就丹墀四拜由西陛

入殿再拜跪承制官宣制以節鉞授大將軍大將軍受
之以授執事者俯伏興再拜出降陛復位四拜駕還宮
大將軍出至午門外勒所部將士建旗幟鳴金鼓正行
列擊節鉞奏樂前導百官以次送出造廟宜社之禮卽
命大將軍具牲幣行一獻禮與遣官祭告廟社儀同其
告武成王廟儀前二日大將省牲祭日大將於幕次命
祝版入就位再拜詣神位前上香奠帛再拜進熟酌獻
讀祝再拜詣位再拜飲福受胙復再拜徹豆望燎其醢
位亦大將行禮兩廡陪祀諸將分獻

禡祭親征前期皇帝及大將陪祭官皆齋一日前一日

皇帝通天冠絳紗袍省牲詣神厨視鼎鑊條旣執事設
軍牙六燹於廟中之北軍牙東六燹西籩豆十二簠簋
各二銅登俎各三設瘞坎位於神位西北設席於坎前
上置酒碗五雄雞五餘陳設如常儀祭日建牙旗六燹
於神位後皇帝服武弁自左南門入至廟庭南正中北
阿立大將及陪祭官分文武重行班於後迎神再拜奠
幣行初獻禮先詣軍牙神位前再詣六燹神位前俱再
拜亞獻終獻如之惟初獻讀祝詣飲福位再拜飲福受
胙又再拜掌祭官徹豆贊禮唱送神復再拜執事官各
以祝幣掌祭官取饌詣燎所太常奏請望燎執事殺雞

刺血於酒碗中酌神燎半奏禮畢駕還若遣將則於旗
燹廟壇行三獻禮大將初獻諸將亞獻終獻
受降洪武四年七月蜀夏明昇降表至京師太祖命中
書集議受降禮省部請如宋太祖受蜀主孟昶降故事
擬明昇朝見日皇帝御奉天門昇等於午門外跪進待
罪表侍儀使捧表入宣表官宣讀訖承制官出傳制昇
等皆俯伏於地侍儀舍人掖昇起其屬官皆起跪聽宣
制釋罪昇等五拜三呼萬歲承制官傳制賜衣服冠帶
侍儀舍人引昇入丹墀中四拜侍儀使傳旨昇跪聽宣
諭俯伏四拜三呼萬歲又四拜出百官行賀禮帝以昶

專治國政所爲奢縱昇年幼事由臣下免其叩頭伏地
上表請罪禮惟命昇及其官屬朝見百官朝賀
奏凱獻俘凡親征師還皇帝率諸將陳凱樂俘馘於廟
南門外社北門外告祭廟社行三獻禮同出師儀祭畢
以俘馘付刑部協律郎導樂以退皇帝服通天冠絳紗
袍升午門樓以露布詔天下百官具朝服以聽儀與開
讀詔赦同大將奏凱儀先期大都督以露布聞內使監
陳御座於午門樓上前楹設奏凱樂位於樓前協律郎
位於奏凱樂北司樂位於協律郎南又設獻俘位於樓
前少南獻俘將校位於其北刑部尚書奏位於將校北
皆北向又設刑部尚書受俘位於獻俘位西東向設露
布案於內道正中南向受露布位於案東承制位於案
東北俱西向宣露布位於文武班南北向至日清晨先
陳凱樂俘馘於廟社門外不奏歌曲俟告祭禮畢復陳
樂於午門樓前將校引俘侍立於兵仗之外百官入侍
立位皇帝常服升樓侍衛如常儀大將於樓前就位四
拜諸將隨之退就侍立位贊奏凱樂協律郎執麾引樂
工就位司樂跪請奏凱樂協律郎舉麾鼓吹振作編奏
樂曲樂止贊宣露布承制官以露布付受露布官引禮
引詣案跪受由中道南行以授宣露布官宣訖付中書

省頒示天下將校引俘至位刑部尚書跪奏曰某官某以某處所俘獻請付所司奏訖退復位其就刑者立於西廂東向以付刑官其宥罪者樓上承制官宣旨有敕釋縛樓下承旨釋訖贊禮贊所釋之俘謝恩皆四拜三呼將校以所釋俘退如有所賜就宣旨賜之大將以下就拜位舞蹈山呼如常儀班前稍前跪稱賀致詞訖百官復四拜禮畢還宮洪武三年六月左副將軍李文忠北征大捷遣官送所俘元孫買的里八剌及寶冊至京師百官請行獻俘禮帝不許事詳本紀止令服本俗服朝見畢賜中國衣冠就謝復謂省臣曰故國之妃朝於

君者元有此禮不必效之亦令衣本俗服入見中宮以中國服就謝十月大將軍徐達及文忠等師還車駕出勞於江上明日達率諸將上平沙漠表帝御奉天殿皇太子親王侍百官朝服陪列達文忠奉表賀禮成退自西階皇太子親王入賀後定凡大捷擇日以宣其日不奏事百官吉服賀即日遣官薦告郊廟中捷以下止宣捷不祭告慶賀永樂四年定凡捷兵部官以露布奏聞大將在軍則進露布官行禮次日行開讀禮第三日行慶賀禮餘如前儀武宗征宸濠還禮部上獻俘儀值帝弗豫不果行嘉靖二十三年十月叛賊王三屢導吉囊

入犯大同官軍計擒之遣官謝南北郊景神殿太社稷
擇日獻俘百官表賀天啓二年四川獻逆犯樊友邦等
山東獻逆犯徐鴻儒等俱遣官告祭郊廟御樓獻俘
論功行賞凡凱還中書省移文大都督府兵部具諸將
功績吏部具勲爵職名戶禮二部具賞格中書集六部
論定功賞奏取上裁前期陳御座香案於奉天殿設寶
案詔書案於殿中誥命案於丹陛正中之北宣制案於
誥命案之北東戶禮三部尚書位於殿上東南大都督
兵部尚書位於殿上西南受賞官拜位於丹墀中序
立位於丹墀西南受賞位於誥命案之南受賞執事位

於受賞官序立位之西每官用捧誥命捧禮物各一人
俱北向餘陳設如朝儀是日鼓三嚴執事官各就位皇
帝衮冕陞座皇太子諸王衮冕自殿東門入侍立受賞
官入就拜位四拜承制官跪承制由殿中門出更戶禮
尚書由殿西門出立於誥命案東承制官南向稱有制
受賞官皆跪宣制曰朕嘉某等爲國建功宜加爵賞今
授以某職賜以某物其恭承朕命宣畢受賞官俯伏興
再拜唱行賞受賞官第一人詣案前跪吏部尚書捧誥
命戶部尚書捧禮物各授受賞官受賞官以授左右俯
伏興復位餘官以次受賞訖承制官吏部尚書等俱至

御前復命退復位受賞官皆再拜三舞蹈山呼俯伏興
復四拜禮畢皇帝還宮各官出至午門外以詔命禮物
置於龍亭用儀仗鼓樂各送還本第明日進表稱謝如
常儀

大閱宣德四年十月帝將閱武郊外命都督府整兵文
武各堂上官一員屬官一員扈從正統間或閱於近郊
於西苑不著令隆慶二年大學士張居正言祖宗時有
大閱禮乞親臨校閱兵部引宣宗英宗故事請行之命
於明年八月舉行及期禮部定儀前期一日皇帝常服
告於內殿行四拜禮如出郊儀司設監設御幄於將臺

上總協戎政大臣巡視科道督率將領軍兵預肅教場
至日早遣官於教場設旗幟之神三大營官軍其甲仗
將官四員統馬兵千名駕文臣各堂上官科道掌印官
禮兵二科禮部儀制司兵部四司官糾儀監射御史鴻
臚寺供事官武臣都督以上錦衣衛堂上及南鎮撫司
掌印僉書官俱大紅便服關領扈從牙牌懸帶先詣教
場是日免朝錦衣衛備鹵簿皇帝常服乘輦由長安左
門出官軍導從鉦鼓振作出安定門至闕武門外總協
戎政官率大小將佐戎服跪迎入將臺下北向序立駕
進闕武門內中軍舉號礮三各營鉦鼓振作扈從官序

立於行宮門外駕至門降輦兵部官導入行宮鳴金止
鼓候升座扈從官行一拜禮傳賜酒飯各官謝恩出將
臺下東西序立兵部官奏請大閱兵部鴻臚寺官導駕
登臺舉礮三京營將士叩頭畢東西侍立總協戎政官
列於扈從官之北諸將列從官之南兵部尚書奏請令
各戎整棚入馬臺上吹號笛麾黃旗總協戎政及將佐
等官各歸所部兵部尚書請閱陣舉礮三馬步官軍演
陣如常法演畢復吹號笛麾黃旗將士俱回營少頃兵
部尚書請閱射總協戎政官以下及聽射公侯駙馬伯
錦衣衛等官俱於臺下較射馬三矢步六矢中的者鳴

鼓以報御史兵部官監視紀錄把總以下及家丁軍士
射以府部大臣并御史兵部官於東西廳較閱鎗刀火
器等藝聽總協戎政官量取一隊於御前呈驗兵部尚
書奏大閱畢臺下舉號旗總協戎政官及諸將領俱詣
臺下北向序立鴻臚寺官奏傳制贊跪宣制訖贊叩頭
各官先退出門外贊扈從官行叩頭禮禮畢駕回行宮
少憩扈從等官趨至門內立皇帝升輦中軍舉礮三各
營皆鼓吹鹵簿及馬兵導從如來儀鈺鼓與大樂相應
振作總協戎政以下候駕至叩頭退馬兵至長安左門
外止鹵簿大樂至午門外止駕還仍詣內殿叅謁如前

儀百官不扈從者各吉服於承天門外橋南序立恭送
駕還迎如之次日總協戎政官以下表謝百官侍班行
稱賀禮如常儀兵部以將士優劣及中箭多寡教練等
第奏聞越二日皇帝御皇極門賜勅勉勵將士總協戎
政官捧至彩輿將士迎導至教場開讀行禮如儀是日
卽行賞賚并戒罰有差次日總協戎政官率將佐復謝
恩詔如議行駕還樂奏武成之典萬曆九年大閱如隆
慶故事

大射之禮後世莫講惟宋史列於嘉禮至明集禮則附
軍禮中會典亦然其制洪武三年定凡郊廟祭祀先期
行大射禮工部製射侯等器其射鵠有七虎鵠五采天
子用之熊鵠五采皇太子用之豹鵠五采親王用之豹
鵠四采文武一品二品者用之糝鵠三采三品至五品
用之狐鵠二采六品至九品用之布鵠無采文武官子
弟及士民俊秀用之凡射時置之於鵠右之又名容見
周禮大司馬服不氏職執旗及侍獲者以蔽身設福及
韋當射時置於前以齊矢設射中五皮樹中天子大射
用之間中天子宴射用之虎中皇太子親王射用之兕
中一品至五品文武官用之鹿中六品至九品及文武
官子弟士民俊秀通用之其職事設司正官二掌驗射

者品級尊卑人力強弱而定耦其中否則書於算兵部
官職之司射二掌先以強弓射鵠誘射以鼓衆氣武職
官充之司射器官二掌辨弓力強弱分爲三等驗人力
強弱以授工部官職之舉爵者掌以馬撞授中者飲光
祿寺官職之請射者掌定耦射射畢再請某耦射侍儀
司職之侍獲者掌矢納於司射器者以隸僕供其役執
旗者六人掌於容後執五色旗如射者中的舉紅旗應
之中采舉米旗應之偏西舉白旗偏東舉青旗過於鵠
舉黃旗不及鵠舉黑旗軍士一人掌之引禮二掌引文
武官進退侍儀司舍人職之太祖又以先王射禮久廢

弧矢之事專習於武夫而文士多未解乃詔國學及郡
縣生員皆令習射頒儀於天下朔望則於公廡或開
地習之其官府學校射略倣大射之式而殺其禮射
位初三十步自後累加至九十步射四矢以三人爲耦
永樂時有擊毬射柳之制十一年五月五日幸東苑擊
毬射柳聽文武羣臣四夷朝使及在京耆老聚觀分擊
毬官爲兩朋自皇太孫而下諸王大臣以次擊射毬
者幣布有差

救日伐鼓洪武六年二月定救日食禮其日皇帝常服
不御正殿中書省設香案百官朝服行禮鼓人伐鼓復



明史卷五十七終
志
圓乃止月食大都督府設香案百官常服行禮不伐鼓
雨雪雲翳則免二十六年三月更定禮部設香案於露
臺向日設金鼓於儀門內設樂於露臺下各官拜位於
露臺上至期百官朝服入班樂作四拜興樂止跪執事
者捧鼓班首擊鼓三聲衆鼓齊鳴候復圓復行四拜禮
月食則百官便服於都督府救護如儀在外諸司日食
則於布政使司府州縣月食則於都指揮使司衛所如
儀隆慶六年大喪方成服遇日食百官先哭臨後赴禮
部青素衣黑角帶向日四拜不用鼓樂

